


柳田文庫
文庫11
D 289
2



文庫 11
D 289
2

元書卷六

邵陽曾廉撰

成宗本紀第六

成宗欽明廣孝皇帝名鐵木耳世祖孫明孝太子第三子也母宏吉刺氏二十二年明孝太子薨二十五年詔督軍以征合丹三十年受皇太子寶撫軍北邊三十一年春世祖崩夏四月壬午至上都東西道諸王畢會甲午即皇帝位追尊皇考為皇帝尊太母元妃曰皇太后大赦天下分賜諸王駙馬有差蠲減諸路差稅各有差是月即墨爾霍五月戊午上大行皇帝尊諡曰聖德神功文武皇帝廟號世祖國語辭禪皇帝皇后昭睿順聖皇后皇考文惠明孝皇帝廟號裕宗庚申祭紫微星於雲仙臺己巳改皇太后所居舊太子府為隆福宮立徽政院置官屬戊寅玉昔帖木兒為太師

元書

卷六 成宗紀

一



010190563885

伯顏爲太傅月赤察兒爲太保並錄軍國重事武清雹六月庚辰朔日有食之壬辰帖木兒復平章政事己亥以乳保勞封完顏伯顏冀國公妻何氏冀國夫人癸卯封駙馬闊里吉思高唐王秋七月南宮新河涑水雹陽信雹大風拔木發屋甲戌詔太師玉昔帖木兒鎮北邊八月庚辰太白晝見浚通惠河九月甲辰口授諸王傅阿黑不花爲丞相丁巳太白經天冬十月戊寅車駕至大都緬人來貢馴象湖廣行院副使劉國傑破黔中蠻十一月壬子罷江南行樞密院甲子湖南宣慰使何瑋參知政事癸酉詔以明年爲元貞元年十二月庚子用帝師言釋京師大辟三十人以祈福太傅錄軍國重事知樞密院伯顏薨

元貞元年春正月戊申阿失罕王來朝壬戌以國忌飯僧七萬於

大聖壽萬安寺癸亥雲南左丞楊炎龍爲左丞庚午江浙平章政事阿老瓦丁參知政事乙亥封駙馬蠻子台濟甯王二月思州田曷刺不花雲南夷卜木四川洞主查閣王金齒帶梅混冬等來見緬國阿刺札高微班的來獻舍利甲午括馬丁酉如上都癸卯工部尙書呂天麟參知政事三月己巳安南世子陳日燝遣使慰國哀並入貢謝寬蕢恩壬子禁朝覲官斂所屬俸壬戌地震庚寅封乳母楊氏趙國安翼夫人夏閏四月爲皇太后建寺五臺山蘭州河清三日五月戊寅命釐正選法辛巳朮麥丁平章軍國重事何榮祖爲昭文館大學士仍與中書省事甲申罷徵逋賦丙申買的僉書樞密院事鞏昌諸地雨雹六月大清河溢乙卯敕凡上封事者命中書省發視後聞湖廣平章政事劉國傑盡平交廣黔中邊地諸蠻責降湖廣江西官不能撫民拒盜者秋七月乙亥詔江南

地稅輸鈔己卯詔各道歲貢儒吏兼通者二人試之舉不公者罪之八月己巳駙馬阿海知樞密院事九月甲戌至自上都已卯罷四川淘金四千戶還元籍冬十月癸卯享於太廟帝親祝玉冊玉寶命獻官迎導納世祖裕宗室戊辰太白晝見十一月甲戌太白經天毯陽酋等遣其兄及弟來見詔江浙行省括隱漏官田檢覈富强避役之戶是月太師錄軍國重事玉昔帖木兒薨十二月丁卯禁諸王輒召有司官吏立皇后伯岳吾氏參知政事梁德珪爲左丞

二年正月己丑御史中丞禿赤爲御史大夫回回不剌罕獻師豹藥物二月括蒙古漸丁以充行伍丙寅大都留守達魯花赤段貞平章政事三月壬申平章政事不忽木爲昭文館大學士平章軍國事丙子如上都夏五月土蕃反殺掠階州軍民遣脫脫會諸王

帖木兒不花只列等討之己丑詔諸徒役者限一年釋之毋杖庚寅詔諸王駙馬及有分地功臣戶居兩部及隆興者與民均納供需丁酉詔諸行省非奉旨無擅調軍是月野蠶成繭猗氏雹六月甲寅頒官吏受贓條格大同諸路雹秋七月廣西賊陳飛等寇昭梧等州湖廣左丞八都馬辛擊平之太原懷孟雹八月禁舶商毋挾金銀諸使海外者毋得爲商立捕盜賞格梁王松山討降元江賊雲南行省也先不花擊平乞藍蠻以爲雲遠路總管府河決杞封邱等五縣是秋叛王多反正行院土土哈至玉龍罕界饋餉安集之藥木忽兒等來朝冬十月壬子至上都江西左丞董士選討平贛州賊十一月荅馬刺進象緬王遣其子來貢十二月立徹里總管府釋在京囚百人

大德元年春正月亦憐眞大王來朝道薨辛卯張斯立參知政事

建五福太乙神壇土土哈同知樞密院事二月蒙陽甸納款入貢以立通西軍民府羅羅斯酋入朝封的立普哇拏阿迪提牙爲緬國王行徽政院副使王慶端爲右丞詔改元赦天下復兩都隆興三年同知樞密院事土土哈薨三月己巳定銓調選法庚午陝西平章政事也先帖木兒平章政事左丞梁德珪爲右丞癸酉田於柳林陝西平章政事脫列伯擊平土蕃寇階州者丙子如上都丁丑封諸王帖木兒不花鎮西武靖王江西右丞八都馬辛爲左丞庚辰札魯花赤脫而速有罪坐棄市庚寅復立江淮等處財賦總管府及提舉司夏四月辛巳朔日有食之五月河決汴梁漳河溢六月乙未太白晝見平伐來降歷陽江溢太原風雹秋七月河復決杞縣蒲口八月丁巳妖星出奎九月八百媳婦寇徹里也先不花帥兵討之罷括兩淮民田壬午至自上都平珠六洞等蠻來降

冬十月詔諸遷轉官注闕二年瓜哇來降戊午太白經天欽察都指揮使牀兀兒大破海都軍於荅魯忽河十一月癸亥詔自今田獵始九月福建行省誘執瑠求百人戊辰增太廟牲用馬高麗王詎請老丁丑詔加詎太尉逸壽王以其世子諶爲高麗國王仍征東行中書省左丞相戊子太白經天十二月甲辰太白經天禁諸王駙馬及權豪奪民田其獻田者有刑初建南郊
二年春正月壬辰詔以水旱蠲減郡縣差稅有差己酉以翰林王惲等七人集賢王容等七人皆耆舊清貧賜之鈔立礪門魚通黎雅長河西甯遠軍民宣撫司歸瑠求俘二月乙丑右丞張九思平章政事己巳田於瀋州丙子罷中外土木之役癸未詔諸王駙馬毋擅祀嶽瀆乙酉如上都丙戌右丞梁德珪平章政事左丞楊炎龍爲右丞三月丁亥申禁官吏受賂詣諸司首者毋得輒受壬子

加四鎮山封號其歲祀咸同嶽瀆夏五月壬辰昭文館大學士何榮祖平章政事左丞八都馬辛爲右丞耽羅來貢六月罷徵湖廣夏稅禁諸王擅行令旨秋七月河決汴梁遣尙書那壞等塞之徵高麗國王諷入侍復以詎爲高麗國王九月己丑安南瓜哇等國各貢方物丙申至自上都冬十一月壬寅右丞王慶端平章政事十二月戊午太白經天乙丑括馬甲戌彗星出子孫星下是歲御史中丞崔或加平章政事薨牀兀兒擊敗篤哇等兵於火兒哈禿駙馬高唐王闊里吉思戰歿

三年春正月癸未朔暹番羅斛沒刺由各來貢獻庚寅遣使問民疾苦蠲減天下賦稅有差封乃刺忽不花大王子藥木忽兒定遠王癸巳江浙左丞相合剌合孫爲左丞相辛丑括馬乙巳太白經天二月癸丑朔行幸柳林丁巳引見省部官壬申加解鹽池神泉

州浙江海神封號庚辰如上都三月癸巳緬國世子入朝命補陀僧齋詔使日本甲午更定律令是春起孔子廟夏四月己卯禮部尙書月古不花爲左丞五月壬午罷江南釋教總統所丙申海南速古臺速龍探奔奚里諸番以虎象及杪羅木舟來貢庚子立征東行中書省撫治高麗六月申禁海商以人馬兵仗往諸番者壬申歲星晝見秋七月釐正江南人戶冒寺籍者八月己酉朔日有食之是月平章政事鐵哥刺眞並罷鐵哥仍議中書省事九月壬辰有流星出自河鼓尾長丈餘色赤光燭地有聲如雷己亥至上都冬十二月癸酉守司徒集賢院使阿魯渾撒里復平章政事是歲命兄子海山總兵北邊省民出公田租

四年春正月詔京師有惡少不法悉黥杖拘役癸酉復淮東漕渠二月丁未朔日有食之丙辰皇太后宏吉刺氏崩丁巳祔葬先陵

諡曰徽仁裕聖皇后乙亥如上都立烏撒烏蒙等郡縣江西參知政事張頤孫殺其所養父之子而取其貲夏四月戊午誅頤孫於龍興市五月同州平灤隆興雹緬阿散哥也弑其王的立普哇孛阿迪提牙遣辭超兀兒討之六月己酉立緬王子窟麻刺哥撒八爲緬國王丙辰太保月赤察兒爲太師右丞相完澤加太傅並錄軍國重事丁巳昭文館大學士平章軍國事行御史中丞不忽木薨秋八月癸卯更定蔭敘格庚申緬阿散哥也等赴闕伏罪罷征緬兵閏月庚子至自上都

五年春正月命整治兩淮鹽政罷征東行省二月立雲南分省以劉深哈刺得並爲右丞鄭祐參知政事以征八百媳婦發四川雲南囚徒從軍丁酉如上都永甯路總管雄控獻馬三月收故官金銀符馬來忽等遣使來見夏四月禁和林釀酒五月商州霜劉深

出順元雲南土官宋隆濟及羅鬼女子蛇節誘西南諸蠻連兵反六月攻貴州知州張懷德戰死遂圍深梁王遣將救之斬首五百級秋七月戊戌朔暴風雹晝晦江海閒民以水溢多死戊申阿木干大王薨癸亥合丹孫脫忽自北境來歸八月遣辭超兀兒征金齒遣官分道振恤察理疑獄九月辭超兀兒等受賂而還坐廢爲民自八月庚辰有彗星出於東井歷紫微及天市垣至是月癸丑乃滅冬十月緬人入貢雲南土官獻方物壬午至上都弛獵禁辛卯有流星大如杯光燭地自北起近東分爲二星沒於危設肆滅直糶米以振飢民其不能自存者廩給五月徭人藍賴率丹陽三十六洞以降是歲鎮南王脫歡薨子老章襲鎮南王北安王那木罕薨太師月赤察兒行邊海都篤哇入寇海山督欽察親軍都指揮使牀兀兒及月赤察兒之師合擊大破之海都走死

六年春正月癸卯詔千百戶自軍逃歸論罪輕重有差乙巳晉王
甘麻刺薨庚戌詔官吏犯罪已經赦者仍從覈問定僧官及僧論
罪令乙卯築渾河隄初令軍官奔喪禁畜鷹犬馬駝人擾民已未
諸王眞童坐誣告濟南王也只里謫之是月海道萬戶朱清張瑄
有罪棄市劉深引兵還宋隆濟復邀之深喪其師二月遣陝西平
章政事也速荅兒參知政事汪惟勤湖廣平章政事劉國傑討西
南諸蠻罷征八百媳婦免劉深官謫諸王孛羅於四川癸巳帝有
疾命釋重囚三月丁巳以水旱赦天下蠲免其差稅三年及一年
有差甲寅合祭昊天上帝皇地祇於南郊遣左丞相合剌合孫攝
事也速荅兒分軍進擣烏蒙烏撒東川芒部阿永及武定威遠普
安諸蠻以次平之夏四月丁卯詔曲赦雲南諸蠻夷戊子如上都
五月乙巳詔給貧乏漢軍地有差逃散者諭復業戊申太廟寢殿

災六月癸亥朔日有食之甲子建孔子廟於京師安南來貢秋八
月甲子詔御史臺凡有司婚姻土田文案遇赦依例檢覆九月誅
龍興民首爲譎言者三人冬十月丙子至上都張珪僉書樞密
院事大司徒平章政事張九思薨十一月劉國傑軍出播州入亦
奚不辭及蛇節戰大敗之同知樞密院事合荅知樞密院事詔江
南寺觀田並輸租充役十二月庚申雲南地震戊辰又震庚辰更
定略賣良人罪例是歲斷大辟三人

七年春二月壬戌詔中書省汰諸有司冗員定樞密院員數辛未
上都留守木八剌沙陝西平章政事阿老瓦丁並平章政事南臺
中丞尙文爲左丞江浙參知政事董士珍參知政事壬申詔樞密
院宗正府事與中書共議奏聞諸司不得擅遷調官吏其雖經特
用而不如例者仍覆奏丁丑定中書省宰執爲八府己卯侍御史

朶白參知政事壬午禁諸路歲課增羨復罷江南財賦總管府及提學司禁内外省城戶部轉運司官私賣鹽引禁毋以金銀絲線等物下番禁非奉旨以寶貨進獻者三月庚寅遣使宣撫巡行天下都城火乙未平章政事伯顏梁德珪段貞阿魯渾薩里右丞八都馬辛左丞月古不花參知政事迷而火者張斯立哈刺蠻子等皆坐贓罷大司農卿洪君祥爲右丞甲辰定贓罪爲十二章京朝官增給祿米外官無公田者亦量給之乙巳劉深棄市笞哈刺解鄭祐罷雲南分省己酉脫歡坐誣告諸王脫脫謫之甲寅如上都是春劉國傑大敗蛇節於墨特川禽斬之夏四月陳天祥張孔孫爲集賢大學士郭筠爲昭文館大學士同議中書省事辛未流朱清張瑄子孫於遠方濟南路霜五月般陽路霜閏月戊午朔日有食之壬戌詔禁犯曲阜林廟己巳太傅錄軍國重事右丞相完澤

薨辛巳詔僧民均差六月更定軍官子弟襲職令秋七月壬戌禁僧假修寺贖諸王令旨乘傳擾民汰宿衛士丙寅左丞相合剌合孫爲右丞相知樞密院事阿忽台爲左丞相丙子詔除集賢翰林老臣與議朝政餘自三品以下年七十者各升散官一等致仕篤哇察八兒明里帖木兒遣使請朝命置驛待之八月辛卯夜地震平陽太原村堡移徙地裂成渠人民多死詔遣使振之仍免其差稅一年庚戌緬人來貢九月戊午至上都丙寅太白晝見徵高麗國相吳所赴闕仍遣高麗世子諫還冬十月丁亥太白經天戊子以浙江年穀不登減海運糧四十萬石癸巳只而合忽知樞密院事詔給曲阜及大都孔廟灑掃戶增蒙古國子生百員十一月己未太白經天十二月丙戌太白經天是歲斷死罪十人順元同知宣撫使宋阿重生致其叔父宋隆濟於京師發雲南降人悉令

元書 卷六
詣闕留 養子阿闕於水西以撫其民

八年春正月己未以災異詔天下恤民隱省刑罰平陽太原復賜復三年隆興及大都諸路二年一年有差減江南佃戶私租十之二癸未禁錮朱清張瑄族屬丙寅御史中丞太僕卿塔思不花爲右丞南臺中丞趙仁榮參知政事是月築河防自滎澤至於睢州平陽地復震壞民新葺屋右丞洪君祥罷二月丙戌增國子生二百員選宿衛大臣子弟充之丙午如上都平章政事商議樞密院事李庭薨三月詔軍民官已除不赴者奪不敘自去年十二月庚戌有彗星出於室入紫微垣至是月乙丑乃滅夏五月癸丑朔日有食之靈仙陽曲天城懷安白登大風雨雹河溢大名諸路六月汝甯人李曹驢妖言惑眾誅之秋七月癸亥靖遠王合贊遣使來貢珍物九月癸丑至自上都庚申江浙平章政事阿里平章政事

伯顏梁德珪復平章政事八都馬辛復爲右丞迷而火者復參知政事庚午戶部尙書張祐參知政事癸酉諸王察八兒篤哇遣使入朝潮州海溢冬十月辛巳宣徽使大都護長壽爲右丞陝西右丞脫歡參知政事丁亥安南來貢庚寅封海山懷甯王戊戌高麗國相吳祈有罪徙安西十一月丁卯復免僧租戊辰武備卿鐵古迭兒爲御史大夫十二月辛丑封廣平王哈兒班荅子出伯威武西甯王

九年春二月癸未始定內侍傳旨用文記甲午免道士賦稅乙未起大天壽萬甯寺丁酉封諸王完澤衛安王改封定遠王藥木忽兒威定王辛丑赦天下令臺院部官各舉賢能以聞除天下差稅有差三月丁未如上都庚戌相加班爲帝師戊午高興平章政事仍樞密副使夏四月大同地震聲如雷懷仁地裂涌水黑有松柏

朽木漂出命除其租役仍振之五月戊申詔訪山林有德行文學識治體者徵赴闕六月庚辰立子德壽爲皇太子賜高年帛八十者一疋九十者二疋孝子順孫堪從政者量才任之釋淹囚出疑獄量移竄遠方者甲午潼川江盜桓州宣德雨雹秋七月辛亥始築郊壇於麗正文明門之南立郊祀署甲寅太白經天壬戌出兄子愛育黎拔力八達於懷州丁卯大司徒段貞復平章政事右丞八都馬辛平章政事參知政事合刺蠻子爲右丞迷而火者爲左丞參議省事也先伯參知政事八月丁丑以尙珍署田五十頃供曲阜孔廟歲祀癸巳復立制用院歸德陳州河溢九月庚申至自上都冬十月丙戌太白經天庚寅駙馬按替不花自篤哇所來歸十一月丙寅歲星晝見庚午始祀昊天上帝於南郊牲用馬一蒼犢一羊豕鹿各九其文舞曰崇德之舞武舞曰定功之舞遣三獻

官攝事壬申太白經天十二月丙子地震庚寅皇太子薨是歲故駙馬高唐王闊里吉思弟駙馬朮忽難襲封高唐王

十年春正月濬吳淞江及眞揚等州漕河罷江南白雲宗都僧錄司發河南民十萬築河防封駙馬合伯昭武郡王始就孔廟西營國子學閏月甲午鐵哥復平章政事江浙平章政事徹里河南平章政事阿散並平章政事行宣政院使張閻四川左丞杜思敬並爲左丞參議省事劉源參知政事晉甯冀甯地震不止二月丙辰封乃剌忽不花大王子孛羅鎮甯王篤哇遣使來朝丁卯月古不花復爲左丞戊辰如上都三月己卯崆古王遣使來貢乙未慮大都囚出上都死囚釋之夏四月雲南羅雄州阿邦龍少結豆溫匡虜合普定路諸蠻爲寇平章政事也速荅兒右丞汪惟能討獲阿邦龍少斬之鄭州暴風雨雹如卵五月同知樞密院事塔魯忽台

塔刺海並知樞密院事封駙馬脫木兒濮陽王六月來安路總管岑雄叛湖廣行院招諭以降秋七月釋諸路罪囚非常赦所不原者宣德雨雹平江大風海溢八月開成地震壞及王宮死故秦王妃以下五千餘人孔子廟成丁巳釋奠於廟牲用太牢樂用登歌冬十月安南入貢青山蠻紅犵獠等來附平章政事徹里薨十一月己巳至自大都十二月壬寅太白晝見乙卯帝有疾禁天下屠宰四十二日丙辰遣官禱於太廟瓊州那蓬洞王何文等作亂伏誅是歲懷甯王海山受諸王降於北邊語在武宗紀牀兀兒知樞密院事高麗國王昫薨復立諛爲高麗國王亦復立征東行省以鎮撫之諛請改名瑋河間民王天下奴弒父磁州民田雲童弒母皆磔裂之以徇

十一年春正月丙寅朔免朝賀皇后召安西王阿難荅及諸王明

里帖木兒入朝癸酉帝崩於玉德殿壽四十二葬起輦谷

論曰成宗號爲能守法度而爲病虐前星弗耀牝雞司晨而內難作矣然非成宗之過也成宗早任合剌合孫資爲羽翼自古未有賢人在位而亂其國者也股肱之寄要在忠良唐宗之言信夫

元書卷六

新甯劉能紀 刊
 門人曾毓善襄校
 門人曾士琮詳校

元書卷七

邵陽曾廉撰

武宗本紀第七

武宗仁惠宣孝皇帝名海山世祖曾孫明孝太子孫也明孝太子
 中子曰荅刺麻八剌太子納妃宏吉刺氏而生武宗號曰海山太
 子大德二年成宗以甯遠王闊闊出總兵北邊怠於禦備命太子
 往代將其軍四年八月及海都戰於闊別列敗之十二月軍至按
 台山乃蠻台舉部降五年八月敗海都於迭怯里古又大敗之於
 合刺合塔太子皆親身陷陣摧其凶鋒由是海都走死事具海都
 傳八年十月成宗封太子為懷甯王賜以金印得食瑞州六萬五
 千戶十年七月踰按台山以追叛王斡羅思獲其妻孥輜重斡羅
 思降復執叛王也孫禿阿及駙馬伯顏而還八月至也兒的石河

受禿滿阿魯灰諸王降冬屯按台山禿曲滅王降復叛擊敗之初成宗久有疾皇后伯岳吾氏秉政其出王弟愛育黎拔力八達及其母宏吉刺氏於懷州皇后謀也十一年正月成宗崩無嗣皇后忌前嫌故不肯立王而召安西王阿難荅左丞相阿忽台平章政事賽典赤伯顏八都馬辛等亦均與阿難荅比欲立之而奉皇后稱制諸王明里帖木兒左右之是時諸宰執多畏禍難平章政事鐵哥遂罷爲宣徽使右丞相合刺蠻子左丞張閻參知政事劉源並罷左丞杜思敬致仕去右丞相合刺合孫獨收百司符印封府庫稱疾守宿掖門數格內旨適王遣康里脫脫計事京師合刺合孫令急還報而遣使趣愛育黎拔力八達於懷州愛育黎拔力八達至則計執阿難荅明里帖木兒送於上都盡收阿忽台伯顏等誅之因自稱監國而遣使奉璽以迎王夏五月乙丑王至上都監國

奉其母以會焉遂廢皇后伯岳吾氏遷於東安以死阿難荅明里帖木兒皆坐誅甲申卽皇帝位追尊皇考爲皇帝尊太母元妃爲皇太后大赦天下賜復三年若一年已逋債招逃亡卹災患優站赤聽治鑄勉勸學校存問鰥寡孤獨壬辰知樞密院事朵兒朵海爲太傅右丞相合刺合孫爲太保並錄軍國重事知樞密院事塔刺海爲左丞相同知宣徽院事牀兀兒也可札魯花赤阿沙不花江浙平章政事明里不花及乞台普濟並平章政事延慶使鈔兒赤和林宣慰使塔海爲右丞江浙左丞劉正及阿里爲左丞遙授左丞欽察福建宣慰使也先帖木兒並參知政事同知樞密院事康里脫脫爲御史大夫知樞密院事牀兀兒平章政事兼知本院仍還鎮邊是月平章政事阿散出行遼陽省事宣政院使脫虎脫平章政事建州大雨雹眞定等路蝗六月癸巳立弟愛育黎拔力

八達爲皇太子立宮闕於旺兀察都以爲中都頒賜朝會諸王金幣有差己亥羅羅斯宣慰使幹羅思爲右丞進太保合刺合孫爲太傅壬寅左丞相塔刺海爲太保加錄軍國重事癸卯置詹事院甲辰和林宣慰使慙刺合兒通政使帖木兒不花並知樞密院事壬子封駙馬瑯阿不刺魯王戊午封駙馬高麗國王璋瀋陽王己未進甯遠王闊闕出爲甯王秋七月癸亥封諸王禿刺越王甲子以卽位告謝南郊丙寅參知政事趙仁榮罷爲太子詹事壬申以卽位祇告太廟癸酉立和林行中書省罷宣慰司而立稱海宣慰司都元帥府以太師月赤察兒爲和林右丞相太傅右丞相合刺合孫出爲和林左丞相丙子江浙平章政事塔失海牙平章政事丁丑封諸王八不沙齊王朵納列濟王迭兒哥兒不花北甯王太師和林右丞相月赤察兒淇陽王太保左丞相塔刺海爲右丞相

御史大夫塔思不花爲左丞相江浙平章政事教化河南平章政事法忽魯丁並平章政事己卯集賢院使別不花平章政事辛巳制加孔子號曰大成以同知樞密院事也兒吉尼知樞密院事御史中丞王壽江浙左丞郝天挺並爲左丞丙戌同知宣徽院事字羅荅失爲左丞參知政事欽察出爲四川左丞左丞劉正爲右丞辛卯發卒二千爲晉王也孫鐵木兒治邸舍以歲飢詔能以私粟賑貸者授官保定等郡水德州蝗八月甲午停內降旨與官乙未治書侍御史兀伯都刺參知政事戊戌封御史大夫康里脫脫秦國公辛亥命以國字孝經賜諸王丁巳左丞王壽改御史中丞戊午左丞孛羅帖木兒爲右丞是月于璋參知政事冀甯地震河閒等地蝗隆平等縣水九月甲子車駕乃至大都壬申追諡皇考曰昭聖衍孝皇帝廟號順宗大行皇帝曰欽明廣孝皇帝廟號成宗

國語完澤篤皇帝元妃謚貞慈靜懿皇后祔焉其廟室太祖居中
西睿宗世祖裕宗東順宗成宗以兄弟爲次焉十月壬寅封平章
政事兼知樞密院事牀兀兒容國公乙巳敕方士日者無游諸王
駙馬之門丙午封御史大夫鐵古迭兒爲鄆國公中衛親軍都指
揮使買閭知樞密院事丙辰收諸行省左丞以下虎符修白浮甕
山河十一月癸亥進鎮遠王牙忽都爲楚王以其子朵納列帖木
兒襲封鎮遠王建寺五臺山戊寅皇太子兼領中書省樞密院十
二月辛丑幸大聖壽萬安寺庚申詔以明年爲至大元年是冬御
史大夫康里脫脫平章政事是歲以恩數遙授官者史不能計至
有伶官授平章者至秋詔定中書十二員而罷脫虎脫仍領宣政
院教化留京師餘各任以別職進威武西甯王出伯爲幽王
至大元年春正月辛酉曲赦御史臺見繫贓吏罪止徵贓罷職癸

亥發六衛軍萬八千五百人以營中都甲子平章政事阿沙不花
改御史大夫緬人來進馴象幽王出伯遣使來進玉乙丑遣使循
行治盜進雲南王也先帖木兒爲營王戊子阿沙不花復平章政
事康里脫脫復爲御史大夫二月汝甯歸德旱蝗三月丁卯建興
聖宮遣使祀嶽瀆名山大川戊寅如上都太保右丞相塔剌海扈
從薨於懷來建佛寺於大都城南加平章政事阿沙不花錄軍國
重事封康國公甘肅右丞脫脫木兒平章政事封嗣漢天師張與
材留國公夏四月戊戌封翰林承旨三寶奴渤海國公香山賓國公
癸卯前平章政事教化加平章軍國重事封魏國公丙辰復罷征
東行省五月己巳管城大雨雹丙子左丞相塔思不花爲右丞相
平章政事乞台普濟爲左丞相癸未濟南般陽雨雹是月緬人進
馴象六六月己丑三寶奴改封應國公加錄軍國重事隴西甯遠

地震烏撒烏蒙七日六大震進威定王藥忽木兒爲定王封駙馬
阿失爲昌王宦者李邦甯爲司徒遙授左丞相復立江浙財賦總
管府提舉司河南山東大飢民食子加乞台普濟錄軍國重事保
定眞定蝗秋七月發千五百人築呼鷹臺於鄴州澤中濟甯眞定
大雨水溢入城壬申封諸王乃蠻歹爲壽王癸未敕省樞密員數
乙酉以豸虎人徹兒怯思爲監察御史敕在外官非奉朝旨毋得
赴闕八月戊子大甯雹戊申宣徽院使瓜頭爲太師九月泉州大
商進沈檀敕驛致之乙亥至自上都泉州大商復進異珍及寶帶
西域馬庚寅諸王禿滿上太宗玉璽封陽翟王冬十月甲午平章
政事阿沙不花改知樞密院事罷大都權酷甲辰以西番僧教瓦
班爲翰林承旨知樞密院事帖木兒不花加錄軍國事司徒禿忽
魯河南右丞也速內史脫孛花並知樞密院事十一月庚申太白

晝見己巳塔思不花乞台普濟並爲右丞相御史大夫康里脫脫
爲左丞相閏月命發廩減直糶民有鬻子者官爲贖之乙巳詔追
商人虎符無乘驛馬甲寅太傅合剌合孫薨十二月庚申封諸王
和郎撒爲隴王是歲封篤哇爲甯肅王篤哇薨其子寬徹及察八
兒請歸朝寬徹復襲封甯肅王郡縣地六震三雨雹三大水十二
飢六蝗大疫死者枕籍

二年春正月庚寅越王禿剌有罪賜死禁方士入官府辛卯皇太
子諸王羣臣上尊號曰統天繼聖欽文英武大章孝皇帝乙未始
親謝於太廟丙申詔內郡賜復一年江淮免夏稅弛山澤之禁內
外百官普覃散官一等有出身考滿者加一等己亥進容國公牀
兀兒句容郡王二月癸亥皇太子如五臺山寺罷泉府行院三月
己丑封西平王奧魯赤子老的罕爲雲南王庚寅如上都是日封

諸王也速不干襄甯王進高唐王朮忽難爲趙王朮忽難請歸爵於闊里吉思子朮安己亥封朮安爲趙王命以朮忽難襲封郿王其月濟陰定陶霽夏四月辛卯立興聖宮江淮財賦總管府起中都角樓郡縣十八蝗五月甲寅定制歲北幸以丞相一人留守京師六月癸亥禁諸賜田者馳驛徵租擾民甲戌詔汰宿衛冗雜者州縣七大雨雹十二蝗秋七月癸未河決歸德己亥河決封邱郡縣十三蝗八月癸丑復立尙書省中書右丞相乞台普濟爲右丞相加太傅太尉宣政使脫虎脫爲左丞相三寶奴樂實平章政事保八爲右丞忙哥鐵木兒爲左丞王罷參知政事己未江西參知政事郝彬參知尙書政事是月右丞劉正告歸州郡十蝗永平隕霜殺禾九月庚辰改行中書省爲尙書省行至大銀鈔詔臣民上書言事指陳得失在外者赴所屬轉達流民復業者蠲其逋欠仍

賜復三年死亡遺骸官收斂之魏國公教化有罪奪爵丙戌至自上都癸巳禁權豪家占據山場聽民樵採己亥始鑄錢冬十月庚戌皇太子爲尙書令丙辰以樂實言增江南富民糧而質其子爲軍辛酉弛酒禁立酒課提舉司癸亥翰林學士承旨不里牙敦爲御史大夫乙丑以皇太后疾赦大辟百人丁卯中書左丞相康里脫脫改知樞密院事御史大夫只兒合郎尙服使大都並知樞密院事丁丑遼陽平章政事合散行中書平章政事參知政事伯都行中書右丞商議省事忽都不丁行中書左丞參議省事鐵里脫歡賈鈞並參知中書政事是月知樞密院事康國公阿沙不花薨太傅尙書右丞相乞台普濟罷左丞相脫虎脫爲尙書右丞相平章政事三寶奴爲尙書左丞相加太保十一月八百媳婦等蠻作亂雲南右丞算只兒威往諭之取賂而還諸王不蘭奚私怨殺人

杖流北鄙丁未擇衛士子弟充國子學生十二月乙卯始親饗太廟加上太祖尊諡曰法天啟運光獻皇后曰翼聖睿宗景襄皇帝曰仁聖莊聖皇后曰顯懿範金作主焉辛酉申禁漢人執弓矢兵仗壬戌陽曲地震有聲如雷丁丑詔定封贈請諡例

三年春正月丁亥白虹貫日辛卯立皇后宏吉刺氏乙未定稅課法丙申立資國院泉貨監叛人上思州知州黃勝許降乖西帶蠻阿馬等連結萬人入寇乙巳命澄敘省院臺官增省之二月浚會通河己巳甯王闊闊出被譖下獄詔釋之流於高麗越王禿刺子阿刺忒納失里坐謀不軌竄漠北執西僧二十二人磔之辛未太師脫兒赤顏加錄軍國重事壬申樂實封齊國公癸酉中書平章政事合散出商議遼陽省事三月乙酉知樞密院事只兒合郎出平章陝西政事壬辰如上都夏四月容米洞官田墨反殺千戶及

戊卒俘掠良民詔往招之戊戌太白晝見丙子增國子生爲三百員靈壽二縣雹鹽山六縣蝗五月甲申封諸王完澤爲衛王合肥六縣蝗六月戊申左丞忽都不丁爲中書右丞己酉立上都中都及雲州朝河銀冶提舉司乙卯給賜和林農具田種諸王察八兒等來朝壬申告祀太廟封尙書左丞相三寶奴楚國公是月襄陽汝六沂兗等路大水襄陽山崩洛水三縣旱秋七月癸巳立河南打捕鷹坊魚課都提舉司己亥禁會通河權要商販挾聖旨懿旨令旨阻民船者壬寅禁近侍奏降御香及諸王駙馬降香者是月循州及汜水六縣水磁威旱蝗八月丁未江浙左丞相忽刺出遙授右丞相釐日並爲御史大夫甲寅白虹貫日甲子獵於昂兀腦兒八路蝗九月己卯平伐蠻酋不老丁降丙戌車駕還宮冬十月甲辰太白經天戊申率皇太子諸王羣臣朝興聖宮上皇太后尊

號曰儀天興聖慈仁昭懿壽元皇太后庚戌親謝太廟辛酉赦天下已逋責停冗役免大都上都中都秋稅一年其月封僧亦憐眞乞烈思爲文國公敕諸司並從尙書省選任臺院有奏用者罪之封諸王水八刺子買住韓爲充王立海道運糧都漕萬戶府御史大夫鐵古迭兒出爲西臺御史大夫十一月辛巳加尙書右丞相脫虎脫太師義國公容米洞蠻降臨安大理等蠻叛丙申始遣官祀天於南郊以太祖配己亥殺武衛親軍都指揮使鄭阿兒思蘭十七人十二月戊申冀甯地震是歲瀋陽王璋進封爲瀋王四年春正月癸酉朔帝不豫免朝賀大赦天下庚辰帝崩於玉德殿壽三十一葬起輦谷

論曰武宗擢甲臨邊至登大位宜有雄武之風而頽然晏安惟麴檠薌澤之爲樂元業自是衰矣遂至鼎鼐充廷名器之賤如屣而欲後人惜其敝袴得乎易曰負且乘致寇至武宗啟之矣

元書卷七

新甯劉能紀 刊

門人曾 煦襄校

門人曾士琮詳校

元書卷八

邵陽曾廉撰

仁宗本紀第八

仁宗聖文欽孝皇帝名愛育黎拔力八達武宗母弟也初號愛育黎拔力八達太子大德九年出居懷州十一年成宗崩太子奔喪入京師克靖內難語在武宗紀中五月武宗既即位六月立為皇太子皇太子好學嘗命詹事王約等譯大學衍義以進曰治天下此書足矣十一月領中書省樞密院至大二年詔兼尚書省四年春正月武宗崩即命罷尚書省誅脫虎脫三寶奴樂實保八王罷杖流忙哥鐵木兒於海南罷城中都徵世祖舊人程鵬飛董士選李謙張閻陳天祥尙文劉正郝天挺董士珍蕭剌劉敏中王思廉韓從益趙君信程鉅夫阿合馬給傳詣闕是時皇太子銳欲條理

庶務而皇太后已召雲南左丞相鐵木迭兒以爲右丞相於是
以右丞相塔思不花改御史大夫太子詹事完澤集賢大學士李孟
並平章政事塔失帖木兒知樞密院事知樞密院事康里脫脫出
爲江浙左丞相復改行尙書省爲行中書省三月庚寅卽皇帝位
於大明殿大赦天下賜大都路民八十者帛人一匹九十者二匹
是月遣宦者李邦甯釋奠孔子廟宣徽使鐵哥爲太傅集賢大學
士曲出爲太保陝西左丞兀伯都刺爲右丞御史中丞李士英爲
左丞昭文館大學士察罕參知政事甯夏地震是月太子詹事月
魯鐵木兒知樞密院事夏四月乙丑封知樞密院事諸王鐵木兒
不花宣甯郡王丁卯詔罷資國院泉貨監廢至大銀鈔銅錢大都
路仍賜復三年徙北甯王迭里哥兒不花湘甯王南陽大雨雹五
月壬午金齒來獻馴象戊子羅鬼來獻方物六月土蕃犯永福鎮

遣兵討之乙巳命侍臣咨訪內外才堪佐國者悉以名聞甲寅封
亦思丹懷甯郡王己未封樞密使孛羅澤國公甲子上大行皇帝
尊諡曰仁惠宣孝皇帝廟號武宗國語曲律皇帝魏王阿木哥來
朝塔刺馬的王獻馴象秋七月詔省臣自今近侍敢輒以文記傳
旨中書可直捕其人下刑部甯遠暴雨山土流涌甘州地震大風
有聲如雷大甯等路霜閏月辛丑命國子祭酒劉賡詣曲阜以太
牢祀孔子甲辰刀斡八刺子阿禮嘉世禮襲封魯王戊申封平章
政事李孟秦國公己酉土蕃寇禮店文州命總帥亦憐眞帥兵討
之敕軍官七十致仕方許子孫承襲黑水白水等蠻來降甯夏地
震宣甯雨雹積五寸八月丙辰安南世子陳日養奉表入貢九月
壬子詔以明年爲皇慶元年江陵路水冬十月特授故太師玉昔
帖木兒子木剌忽知樞密院事十一月戊戌封司徒買僧趙國公

罷諸營繕辛亥諸王不里牙屯等坐誣齊王八不沙不實詔竄不里牙屯於河南因忽乃於揚州納里於湖廣太那於江西班出兀那於雲南己未合散復平章政事十二月癸酉封宣政會福院使俺普秦國公庚辰太白經天癸未太白經天占城入貢庚寅申禁漢人持弓矢兵器田獵赦大都大辟囚一人并流以下罪壬辰太白經天是歲立淮安忠武王伯顏祠於杭州太師錄軍國重事和林右丞相淇陽王月赤察兒薨封乃刺不花子藥木忽兒爲定王封刺甘失甘子阿海鎮甯王

皇慶元年春正月甲辰太師錄軍國重事知樞密院事脫兒赤顏襲封淇陽王庚戌封駙馬丑漢安遠王出總北軍戊午徙濟王朵列納吳王崇福使也里牙封秦國公二月庚午西北諸王也先不花來貢珠寶皮幣馬駝甲戌制定封贈名爵等級改和林爲嶺北

省己卯入百媳婦獻馴象二壬午封孛羅永豐郡王三月己亥詔名生日曰天壽節丙午敕北邊使者非軍機毋給驛戊申前河南平章政事荅失海牙爲御史大夫丙辰封同知宣徽院事常不蘭奚趙國公乙丑命河南建故丞相阿朮祠堂封諸王塔思不花恩平王是月八刺脫因爲左丞夏四月癸酉如上都丙子太白晝見知樞密院事木剌忽襲封廣平王庚寅太白經天安陽蝗五月丙申平章政事合散爲左丞相江浙平章張閻平章政事睢陽河溢六月乙丑朔日有食之丁卯天雨毛敕李孟博選中外才學之士七月丙午參知政事賈鈞致仕八月己卯吏部尙書許師敬參知政事庚辰至自上都九月甲辰參議省事阿禮海牙參知政事拘火者等所佩國公司徒印瓊州賊嘯聚遣官諭之十月癸未參知政事察罕加平章政事商議省事十一月丙午諭六部官毋越中

書奏事丙辰進駙馬濮陽王脫脫木兒爲岐王占城貢犀象緬人及雲南不農蠻酋入朝十二月癸亥平章政事李孟請致仕罷爲翰林學士承旨樞密副史張珪平章政事癸酉知樞密院事荅失蠻罷爲翰林學士承旨遣使慮囚是歲諸王春丹反賜甯王闊闊出還阿撒罕爲太師

二年春正月甲午察罕腦兒宣慰使伯忽爲御史大夫辛丑封前尙書右丞相乞台普濟安吉王丙午甯王闊闊出薨右丞相鐵木迭兒罷丁未大府卿禿忽魯爲右丞相二月壬午諸王也先不花進馬駝璞玉三月丙申御史中丞脫歡爲御史大夫丙午立宏吉刺氏爲皇后丁未有彗星出於東井丙辰以亢旱默禱得雨詔勸農桑夏四月甲子崇星於司天臺乙亥如上都丙子兼藩王高麗國王璋辭高麗王位而請留京師以其世子燾襲高麗國王辛巳

御史大夫伯忽爲太傅乙酉詔革弊政罷不急之役眞定等路飢量除田租仍禁酒安南來貢五月平章政事張珪罷辛丑右丞兀伯都刺平章政事左丞八剌脫因爲右丞參知政事阿禮海牙爲左丞參議省事禿魯花帖木兒參知政事檀州等地蝻六月己未朔京師地震丙寅又震己卯詔選方正博洽之士任翰林侍讀侍講學士甲申建崇文閣於國子監以宋儒周敦頤程顥程頤張載邵雍司馬光朱熹張栻呂祖謙及故中書左丞許衡從祀孔廟是月河決陳亳等州秋七月辛卯太白晝見乙未太白晝見壬寅京師地震丙辰太白晝見丁巳太白經天是月廩保定等路流民仍免差稅八月戊午太白晝見崇明大風海溢丁卯至上都庚午侍御史辭居敬參知政事九月相兒加思巴爲帝師宣徽院使完澤知樞密院事戊申封諸王脫歡安定王建銀山寺京師大旱疫

冬十月己卯封不荅滅里安德王十一月甲辰始詔行科舉十二月丙子定百官致仕格是歲甯遠王僻徹禿襲封甯王

延祐元年春正月丁亥前右丞劉正平章政事庚子江浙左丞高昉參知政事詔訪遺逸丁未詔改元釋流以下囚大都上都賜復二年餘被災戶已振者蠲免差稅一年二月甲戌詔免蒙古地差稅二年商賈勿免侍御史趙世延參知政事壬午左丞相合散爲右丞相右丞相禿忽魯罷參知政事高昉罷爲集賢學士三月東平等郡大雨雪三日己亥白暈亙天連環貫日癸卯暹國入貢丙午阿魯禿襲封趙王戊申如上都癸丑平章政事察罕致仕閏月汴梁諸路霜殺桑果禾苗馬八兒入貢夏四月壬辰欽察王伯忽薨月祖別襲爲王己酉敕賜郡縣勤職者幣帛加鐵木迭兒錄軍國重事六月戊子封河南省左丞相卜憐吉帶爲河南王秋七月

詔開下番市舶之禁申禁私鹽武清渾河決八月戊子至自上都九月己巳右丞相合散改爲左丞相鐵木迭兒復爲右丞相罷陝西諸道行御史臺冬十月庚戌遣張閎經理江南田糧十一月陝西右丞蕭拜住爲右丞前右丞相禿魯忽及翰林學士承旨荅失蠻並知樞密院事十二月壬辰詔定輿服制度庚子遣使浚淮揚運河李孟復平章政事是歲以孔子五十五世孫思晦襲封衍聖公冀甯汴梁等路地震大甯地三震聲如雷路二十三水

二年春正月己未太白晝見癸亥發卒濬瀟州漕河乙亥詔置宣撫遣分道問民疾苦黜陟官吏二月己卯太白晝見癸巳太白經天庚子公哥羅古羅思監藏班藏卜爲帝師壬寅雲南王老的來朝辰沅洞蠻叛詔發兵討捕之丙午太白經天三月乙卯始廷試進士庚午加上皇太后尊號蠲逋欠稅課丁丑平章政事張閎復

出爲江浙平章政事夏四月戊寅朔日有食之庚子命李孟等類
集累朝條格乙巳如上都丙午封諸王察八兒汝甯王是月贛州
蔡五九聚眾作亂五月戊申復立陝西諸道行御史臺乙丑夜疾
風電雹成紀山移庚午太白晝見壬申撒都失里大王薨甲戌加
授宦者續元暉昭文館大學士甲申太白晝見六月戊戌河決鄭
州丙午緬國來貢蔡五九圍甯都分掠郡邑秋七月畿內大雨水
八月蔡五九陷甯化自稱王詔省兵討之罷經理田糧己丑至自
上都壬寅增國子生百員九月蔡五九眾潰伏誅冬十月丙子客
星見太微垣丁丑封脫火赤威甯郡王忽兒赤帖木兒不花趙國
公庚辰淮西廉訪使郭貫參知政事乙未同知樞密院事鐵木兒
脫知樞密院事阿撒罕落太師出爲陝西左丞相丁酉右丞相鐵
木迭兒爲太師癸卯八百媳婦獻馴象二十一月丙午客星變爲

彗犯紫微垣歷軫至壁十五宿明年二月庚寅乃滅辛未赦天下
減免各路差稅有差甲戌封武宗子和世琜爲周王是歲封皇子
兀都思不花爲安王

三年春正月丙午封前左丞相忽魯答兒壽國公辛酉同知樞密
院事買閭知樞密院事三月瀋王璋復請遜位以其世子曷襲封
瀋王周王和世琜出鎮雲南置周王常侍府癸酉如上都禁春獵
夏四月橫州獠爲寇發湖廣兵討捕之敕衛輝昌平修殷比干唐
狄仁傑廟歲致祭焉己亥賞善課農桑淮東廉訪使僉事苗好謙
衣一襲庚子上都留守憨刺合兒復知樞密院事五月庚申大都
留守別帖木兒右丞蕭拜住並平章政事左丞阿禮海牙爲右丞
參知政事郭貫爲左丞參議省事不花參知政事庚午置甘肅儒
學提舉司六月乙亥制封孟軻父母邾國公夫人丙子融賓柳州

元書 卷八
六
搖叛命發省兵討之丁丑敕大辟臨刑敢有橫加剗割者以重罪
論凡鞫囚非強盜毋加酷刑河決汴梁秋七月命整治臺綱乙卯
封黃兀兒子玉龍帖木兒保恩王丙辰燕帖木兒復知樞密院事
八月癸酉兵部尚書乞塔參知政事己卯至自上都九月辛丑左
丞郭貫罷爲集賢大學士集賢大學士王毅爲左丞庚戌以帝生
地改縉山縣爲龍慶州癸丑太白晝見己未冀甯二路地震丙寅
太白經天冬十月江南侍御史高昉復參知政事壬午河南地震
十一月陝西左丞相阿思罕等以周王和世琜反阿思罕尋被殺
和世琜逃於漠北十二月庚午知樞密院事禿忽魯出爲陝西左
丞相丁亥立皇子碩德八剌爲皇太子領中書省樞密院是歲封
諸王脫脫爲遼王駙馬紐林的斤襲封高昌王奪楚王朵剌帖木
兒爵

四年春正月庚子詔省刑薄賦乙巳詔原爲阿思罕註誤者大赦
天下丙辰知樞密院事完澤出平章雲南政事壬戌冀甯地震閏
月庚辰進鎮甯王孛羅爲冀王丙戌以立皇太子給賜鰥寡孤獨
減免租賦有差辛卯封曲烈魯子別帖木兒汾陽王三月辛卯如
上都戊申叛王荅合孫寇邊吳王朵列納敗之於和懷己未紐憐
王薨夏五月平章政事蕭拜住罷爲典瑞院使翰林學士承旨赤
因帖木兒右丞阿禮海牙平章政事參知政事乞塔爲右丞高昉
爲左丞參議省事換住張思明並參知政事六月乙巳太師右丞
相鐵木迭兒罷並落太師左丞相合散復爲右丞相壬子工部尚
書王桂參知政事參知政事張思明罷爲工部尚書丁巳安南來
貢秋七月平章政事李孟罷爲翰林學士承旨江浙平章政事王
毅平章政事己丑成紀山崩辛卯冀甯地震八月丙申至自上都

九月丙寅右丞相合散復爲左丞相宣徽使伯答沙爲右丞相己巳嶺北地震三日冬十月壬寅命御史大夫伯忽參知政事王桂祭西嶽鎮振卹秦災戊午敕江浙省資遣海外遇風漂至賈人回國十一月復浚揚州運河壬辰禁宿衛非有旨不得上殿闕入禁中十二月丙宰領延福司事禿滿迭兒知樞密院事是歲進保恩王玉龍帖木兒爲恩王加晉王丙史按攤出魯國公

五年春正月甲戌懿州地震丙子安南來貢加湖廣平章政事買住魯國公二月癸巳朔日有食之和甯地震丁酉秦安山崩封諸王晃火帖木兒爲嘉王禿滿帖木兒武平王戊申起盃頂殿庚申論討叛王脫火赤功頒賞諸王以下有差三月乙亥安遠王丑漢知樞密院事加錄軍國重事癸未封晉王丙史拾得閻桓國公夏四月壬辰安吉王乞台普濟薨甲寅侍御史敬儼參知政事戊午

如上都五月辛酉順元洞蠻奉獻丁卯御史中丞亦列赤爲右丞癸酉遣使慮囚己卯德慶地震隴西山崩六月癸巳魏王阿木哥以罪貶居高麗乙巳誅謀篡取魏王術者趙子玉七人秋七月壬申坐討叛王不里牙敦持兩端流諸王也舍於江西失列吉於湖廣己卯雍吉刺帶王曲春鐵木兒王來朝戊子甯遠山崩加封楚屈原忠節清烈公八月庚子至上都九月丁卯右丞亦列赤平章政事左丞高昉爲右丞參知政事換住爲左丞吏部尙書燕只干參知政事冬十月播州南甯長官作亂諭降之壬辰建帝師八合思八殿於大興教寺十一月丁卯禁濫受宣敕冒籍貫宿衛及巧受遠方官職不赴任求別調者己巳同知樞密院事忠嘉知樞密院事是歲封諸王八朵兒甯海王

六年春正月丁巳暹國來貢南恩新州搖爲寇發江西兵討之二

月丁亥朔日有食之雲南諸蠻爲寇命行省從宜剿捕之三月丁巳以天壽節釋重囚一人寇入幹端遣鎮西武靖王搠思班討之御史中丞脫脫哈爲御史大夫己巳敕諸王駙馬宗姻領於內八府勿徑移文中書封黃兀兒王子月魯帖木兒爲恩王免大都上都興和大同今歲租夏四月庚子如上都靖遠王合贊薨六月庚戌大同雨雹如卵州縣六大雨雹路十一水秋七月丙辰緬人來貢來安路總管岑世興叛據唐興州賜璽書招諭之己卯遣使審錄晉王也孫帖木兒部內罪囚八月甲申河東山西道宣慰使張思明參知政事庚子至上都伏羌山崩閏月浚會通河壬申進太傅御史大夫伯忽爲太師九月甲申徽政使朵台爲太傅參議省事欽察參知政事冬十月辛酉札魯花赤鐵木兒不花爲御史大夫庚午太白晝見浚通惠河十一月木邦路帶邦爲寇敕雲南

省招討之十二月壬戌命皇太子參決國政封宋儒周敦頤道國公免大都上都興和明年差稅壬申允平章政事王毅告養仍賜其父幣帛

七年春正月辛巳朔日有食之帝齋居損膳輟朝賀丁亥帝不豫辛丑帝崩於光天宮壽三十有六葬起輦谷

論曰元代科舉之議久矣至延祐而後行之何其難乎夫元代文學之盛亦不須科舉也然儒風以振矣天下嘖嘖以盛事歸之仁宗不亦宜乎

新甯劉能紀 刊

門人曾傳儒襄校

門人曾士琮詳校

元書卷八

元書卷九

邵陽曾廉撰

英宗本紀第九

英宗睿聖文孝皇帝名碩德八剌仁宗嫡子也母曰莊懿慈聖宏吉刺皇后延祐二年仁宗及皇太后謀出周王和世球於外而以儲位屬之則力辭於太后曰臣幼無能宜立兄以臣輔之太后固不許三年立為皇太子七年正月仁宗不豫憂形於色夜則焚香禱天求以身代及仁宗崩哀毀過禮素服寢於地日啜一粥其月皇太后命太子太師鐵木迭兒復為右丞相右丞相伯答沙罷為集賢大學士二月江浙左丞相黑驢陝西平章政事趙世榮並平章政事平章政事赤因鐵木兒御史大夫脫歡並罷為集賢大學士平章政事兀伯都剌出平章甘肅政事阿禮海牙出平章湖廣

政事江西右丞木八剌爲右丞參知政事張思明爲左丞左丞換
住出爲嶺北右丞鐵木迭兒遂殺崇祥院使蕭拜住集賢學士楊
朵兒只并籍其家奪李孟秦國公三月壬午瓜哇入貢戊子徵諸
王駙馬流竄者給侍從遣就分邑庚寅卽皇帝位於大明殿尊皇
太后爲太皇太后大赦天下壬辰復加鐵木迭兒太師乙未日有
暈如連環丙申叛王斡羅思等內附壬寅左遷致仕平章政事李
孟爲集賢侍講學士甲辰詔中外無沮議鐵木迭兒夏四月庚戌
詔罷行中書省丞相並降平章政事甲寅封諸王徹徹禿爲甯遠
王申詔均役己未紹慶洞蠻爲寇命四川討捕之庚申太常禮儀
院使拜住平章政事壬戌鐵木迭兒請參決政務禁諸臣無得隔
越擅奏從之戊辰如上都罷市舶司復禁賈人下番五月庚辰殺
上都留守賀勝己丑左丞相合散出平章嶺北政事平章政事拜

住爲左丞相乃剌忽御史大夫塔失海牙並平章政事只兒合郎
參知政事辛卯參知政事欽察罷爲集賢學士乙未上大行皇帝
尊諡曰聖文欽孝皇帝廟號仁宗國語曰普顏篤皇帝戊戌平章
政事黑驢嶺北平章政事合散御史大夫脫脫哈徹政使失列門
坐謀廢立皆伏誅辛丑知樞密院事鐵木兒脫平章政事丁未封
梁王松山子王禪爲雲南王六月己酉流徽政使米辟迷於金剛
山甲寅誅前太子詹事牀兀兒京師疫丁巳江西左丞相康里脫
脫爲御史大夫御史大夫鐵木兒不花知樞密院事戊午罷徽政
院封知樞密院事荅失帖木兒薊國公乙丑新作太祖幄殿西番
盜洛各目降益都蝗荆門旱棣州高郵江陵水盪屋僧圓明聚眾
反稱皇帝秋七月括大同興和冀甯馬甲申知樞密院事買閭哈
丹並出平章遼陽政事乙未甘肅平章政事欽察知樞密院事丙

元書 卷九
申平章政事乃剌忽罷降安王兀都思不花爲順陽王禁獻珍寶
庚子江南行御史中丞廉恂平章政事己巳知樞密院事也兒吉
尼出平章江西政事八月乙卯陝西省兵禽圓明誅之丙辰耐仁
宗聖文欽孝皇帝莊懿慈聖皇后於太廟戊午四川平章政事趙
世延被譖下獄河間水九月甲申建壽安山寺吐蕃五種寇成谷
循州溪蠻常澧州洞蠻皆爲寇各遣兵討之木邦土官入貢冬十
月陽聳儂洞蠻爲寇命招捕之戊午至自上都安南來貢乙丑幸
大護國仁王寺西陽土官及大小石隄洞蠻入貢癸酉流諸王阿
剌鐵木兒於雲南十一月丁丑以卽位親謝太廟戊寅大賚諸王
百官有差庚辰括順陽王兀都思不花財物入章佩監中政院交
趾蠻爲寇命討之遣使閱實各行省戍兵十二月乙巳詔以明年
爲至治元年減免天下差稅有差恤命官流落邊遠者監察御史

廉訪司舉可任守令歲二人七品以上官有偉畫長策者實封上
之士有足隱居行義者具狀以聞丁未播州蠻來降乙卯加上
太皇太后尊號丙寅典瑞使闕徹伯知樞密院事己巳敕罷明年
二月八日迎佛右丞木八剌出爲江西右丞參知政事只兒合郎
爲右丞江南廉訪使辭居敬復參知政事上思州徭結交阻寇忠
州是歲殺順陽王兀都思不花殺宣徽使禿堅不花出伯子喃忽
里襲封國王河決汴梁滹沱渾河決溢成紀山崩延津大風晝晦
大同雹如卵益津隕黑霜

至治元年春正月丙戌始服袞冕享於太廟始親舉四時孟月享
禮二月辛亥調軍修上都華嚴寺丁巳畋於柳林敕更造行宮是
月起大寺於壽安山殺監察御史觀音保鎖咬兒哈的迷失杖流
成珪李謙亨於奴兒干三月丙子緬人入貢疏小直沽白河辛巳

如上都己丑大同麒麟生辛丑宣徽院使鐵失爲御史大夫領忠
翊侍衛親軍都指揮使是春右丞只兒合郎罷爲上都留守平章
政事王毅右丞高昉並罷夏四月己未造象駕金脊殿吉陽黎蠻
寇甯遠五月壬午遷親王圖帖睦爾於海南禁日者無交通諸王
駙馬掌陰陽五科者毋泄占候興國路以去歲早免其租起行殿
於龍慶流杯池乙未命世家子弟成童者入國學六月癸卯朔日
有食之丁巳參知政事敬儼出爲陝西御史中丞辛酉太白經天
趙宏祚言事勒歸田里禁妄言時政乙丑遣使往銓江浙江西湖
廣四川雲南邊郡官己巳上都留守只兒合郎平章政事秋七月
黃平蠻爲寇萬戶何之祺坐削官封太尉字蘭奚和國公八月乙
卯平章政事鐵木兒脫罷爲上都留守九月壬辰平章政事塔失
海牙坐贓杖免丁酉至自上都冬十月甲辰太白經天癸丑敕翰

林集賢官年老者毋致仕己巳遣樞密使燕帖木兒巡邊十一月
乙亥幸大護國仁王寺戊寅羣臣上尊號曰繼天體道敬文仁武
大昭孝皇帝辛巳命鐵失領阿速衛十二月辛丑立皇后亦乞烈
氏庚戌作太廟正殿甲寅幸灌頂寺疏玉泉河己未封帝師兄唆
南藏卜白蘭王頒金虎符於各行省平章政事是歲流前藩王璋
於土蕃大都及諸路十九大水渾河滹沱巨馬溢決安陸漢水溢
雷州海溢成紀山崩臨江旱滁州霖雨傷稼路三蝗三雨雹蠲租
振卹有差

二年春正月己巳朔安南占城來貢庚午廣太廟甲戌禁漢人執
兵器出獵及習武藝丁丑親享太廟始陳鹵簿賜導駕耆老幣帛
戊寅命有司存恤孔氏子孫貧乏者振山東河南飢辛巳敕臺憲
用人勿拘資格儀封河溢癸未流徽政使羅源於耽羅封塔察兒

蘭國公二月癸卯江南行臺御史大夫欽察平章政事江浙參知政事王居仁參知政事參知政事辭居敬出爲河南左丞乙卯遼陽平章政事買閭平章政事是月諸王怯伯進文豹及海東青鵠三月己巳敕四宿衛興聖宮及諸王部勿用南人戊寅修都城復置市舶提舉司於泉州慶元廣東三路禁子女金銀絲絛下番丁亥鳳翔道士王道明妖言伏誅己丑有暈貫日如連環命有司建太師國王木華黎祠於東平辛卯遣御史錄囚丁酉幸柳林夏四月戊戌如上都五月庚午王驢兒以泰符臨邑人謀逆伏誅癸未御史大夫康里脫脫出爲南臺大夫甲申幸五臺山平章政事只兒合郎復改御史大夫戊子禁民集眾祈神閏月戊戌封諸葛忠武侯爲威烈忠武顯靈仁濟王癸卯諸王阿馬成童坐擅徙脫列捏王衛士杖流海南戊申以鐵木迭兒子同知樞密院事班丹知

樞密院事壬子起紫檀殿沅陵洞蠻爲寇命討捕之秋七月壬子遣諸王徹徹禿總兵北邊戊午行幸應州曲赦金城囚徒辛酉行幸渾源州左丞張思明有罪杖免籍其家八月甯遠民符翼軫作亂有司討禽之甲戌行幸奉聖州戊寅詔畫蠶麥圖於盃頂殿壁庚寅鐵木迭兒死詔賜葬地九月丙辰太皇太后宏吉刺氏崩冬十月丙子南臺大夫康里脫脫以譖杖謫雲南己丑左丞相拜住爲右丞相南恩州賊覃庚生降十一月甲午朔日有食之己亥詔流民復業者賜復三年站戶鬻妻子官贖還之凡差後造作先科商賈末技富實之家以優農力量免陝西及各處官佃田明年租江淮勑科包銀全免之安南來貢癸卯地震乙卯宣德地震真人蔡道泰殺人誅死刑部尙書不荅失里范德郁並坐免十二月甲子南康建昌大水山崩丁卯平章政事買閭罷爲大司農廉恂罷

元書 卷九 五
爲集賢大學士集賢大學士張珪復平章政事甲戌遣兵討岑世興鐵木迭兒子宣政使八思吉思伏誅籍其家知樞密院事欽察台罷爲宣政使參知政事速速爲左丞宗仁衛都指揮使馬刺參知政事癸未御史大夫只兒合郎復知樞密院事封衛王完澤子徹徹禿武甯王乙酉杭州火辛卯平章政事張珪足疾免葛蠻安撫副使龍仁貴柔遠州洞蠻把者爲亂並命捕之是歲水旱風蝗之災尤甚諸路荐飢減免租稅有差仍振之駙馬許納子速怯及斡羅思皆以告訐父母坐誅

三年春正月癸巳朔暹國及八番洞蠻來貢壬寅罷上都諸金銀冶前樞密副使吳元珪王約爲集賢大學士翰林侍講學士韓從益爲昭文大學士並商議中書省事遣諸王忽刺出鎮雲南丁巳出趙世延於獄思明州及靜江邕柳諸獠各爲亂發湖廣兵討之

泉州留應總作亂發江浙兵討之二月戊辰天壽節賓丹瓜哇來貢己巳修廣惠河牐治野狐桑乾道癸酉畋於柳林辛巳頒行大元通制於天下司徒劉夔同僉宣政院事囊加台坐妄獻地土冒取官錢棄市丙戌雨土京師飢戊子封鷹師不花爲趙國公辛卯欽察王月祖伯遣使來朝三月壬辰如上都丁未西番參卜郎諸族叛鎮西武靖王搠思班發兵討之戊申上太皇太后尊諡曰昭獻元聖皇后辛亥禁僧道度牒符錄夏四月己巳浚金水河丁亥羅羅斯娑住邦奉獻五月戊戌太白經天庚子大風雨雹柳林行宮大木拔辛丑以鐵失獨署御史大夫事壬寅詔中外開言路戊申命毀鐵木迭兒碑並追奪其官爵封贈制書戊午奉元正殿行宮災上都利用監火眞定保定大名大同霖雨大水或旱蝗六月丁卯遣徽政使丑驢往督師以討參卜郎壬申將作院使哈撒兒

不花坐罔上營利杖流東裔籍其家諸王怯伯遣使來降秋七月
壬辰占城王弟保佑八刺遮來貢癸卯知樞密院事班丹坐贓杖
免己酉封諸王忽都帖木兒威遠王丙辰永甯王卜鐵木兒不法
命宗正府及近侍雜治其傅籍鐵木迭兒家八月癸亥車駕南還
大都御史大夫鐵失知樞密院事淇陽王也先帖木兒前平章政
事赤因帖木兒等弑帝於南坡行幄及右丞相拜住帝時年二十
一葬起輦谷帝性英明知治體嘗御盃頂殿謂拜住曰朕嗣承大
位錦衣玉食何求不得惟我祖宗櫛風沐雨戡定萬方曾有此樂
耶拜住頓首對曰創業至艱守成不易陛下興言及此億兆之福
也又嘗謂大臣曰省臺選人署事未旬日輒互相改除今山林隱
逸良多卿等不能盡心求訪乃徒引親故耶巴而思吉下獄謂左
右曰若人事朕日久然法者祖宗所制非朕所得私也其明鑑如

此

論曰英宗知趙世延之非辜抑亦漢昭之流亞也然漢昭能誅燕
王上官桀而專任霍光英宗不能誅鐵木迭兒諸權倖之徒獨任
拜住也抑考元時蒙古人橫不可悉裁以法度以拜住之世舊勳
貴而不能驟正也夫自古無無小人之朝在振紀綱而已自世祖
好貨開倖進之門安童不能與阿合馬桑哥爭况幼冲在位乎使
霍光處此則必射隼於高墉藏器偃回操刀弗割明君賢相胥受
其禍悲夫

元書卷九

新甯劉能紀 刊
 門人曾 協襄校
 門人曾士琮詳校

元書卷十

邵陽曾廉撰

泰定帝本紀第十

泰定皇帝名也孫鐵木兒明孝太子孫晉王甘麻剌長子也母宏吉刺妃成宗大德六年襲封晉王世鎮北邊統領太祖四大斡耳朵及軍馬達鞞國土英宗立鐵失獨署御史大夫事並領左右阿速衛軍然自以為鐵木迭兒黨而懼遂萌異志至治三年八月鐵失先使人通於王言相推戴王命囚其使赴上都告變未及至而英宗已遇弒諸王按梯不花及知樞密院事淇陽王也先帖木兒奉皇帝璽綬以迎王九月癸巳即皇帝位於龍居河大赦天下是日也以先帖木兒為右丞相阿難荅子月魯帖木兒襲封安西王其月內史倒刺沙平章政事乃馬歹為右丞內史善僧為左丞御

史大夫鐵失前雲南平章政事完澤撒的迷失馬某沙知樞密院事馬速忽僉書樞密院事章台同知樞密院事衛士禿滿同僉知樞密院事召諸王官屬流徙遠地及還原籍二十四人還京師冬十月甲子遣使至大都以卽位告天地宗廟社稷遂誅逆賊也先鐵木兒完澤禿滿於行在鐵失答失兒赤因帖木兒脫火赤章台等於大都並戮其子孫籍其家以宣政使旭邁傑爲右丞相內史按攤出爲太師知樞密院事江浙平章政事兀伯都刺平章政事陝西左丞相禿忽魯通政使紐澤並御史大夫湖廣右丞速速爲御史中丞十一月己丑車駕次旺果察都丙申行次祖嬀辛丑至大都丁未御大明殿受諸王百官朝賀癸丑遣使詣曲阜以太牢祀孔子十二月詔雪蕭拜住楊朵兒只賀伯顏觀音保鎖咬兒哈的迷失李謙亨成珪及王毅高昉張志弼存者召還錄用死者贈

官有差戊辰上皇考晉王尊諡曰光聖仁孝皇帝廟號顯宗皇妣晉王妃曰宣懿淑聖皇后庚午以卽位大賚諸王百官金幣有差盜入太廟竊仁宗及莊獻慈聖皇后金主壬申作仁宗主仍令有司捕盜治之征東夷民奉獸皮來附鎖南月魯禿禿哈速敦皆以逆伏誅並流諸王月魯帖木兒於雲南按梯不花於海南曲呂不花於奴兒干孛羅及斡羅思不花於海島封買奴爲泰甯王前太師伯忽商議軍國重事丁亥平章政事倒刺沙爲左丞相詔以明年爲泰定元年免天下差稅有差賜高年帛求直言是月欽察王月卽別遣使來朝是歲迭里哥兒不花子八刺失里襲封湘甯王雲南湖廣徭蠻及西番爲寇廣東新會民作亂詔招捕之諸路風雹水旱火霜成災岷州疫振卹其人有差

泰定元年春正月乙未右丞乃馬歹平章政事左丞善僧爲右丞

元書 卷十 二
壬寅錄故丞相拜住子荅兒麻失里徹里哈並爲親軍都指揮使
己酉召還親王圖帖睦爾及阿木哥命諸王遠徙者悉還其部甲
寅復前藩王璋故爵歸其印丙辰敕封解州鹽池神曰靈富公二
月甲子作佛事命僧百八人及倡優百戲導帝師游京城壬申上
大行皇帝尊諡睿聖文孝皇帝廟號英宗國語格堅皇帝甲戌開
經筵諸王怯別孛羅高昌王帖木兒不花皆入獻三月丁亥參知
政事王居仁罷爲太子副詹事同知宣徽院事楊廷玉參知政事
乙未江西平章政事也兒吉尼知樞密院事庚子平章政事欽察
罷爲陝西御史大夫遣使往征西番參卜郎丙午立宏吉刺氏爲
皇后阿里吉八爲皇太子己酉皇子八的麻亦兒間卜嗣封晉王
泰甯王買奴薨以其子亦憐真多兒只嗣封泰甯王遣湘甯王八
刺失里出鎮察罕腦兒知樞密院事也兒吉尼出爲雲南右丞相

召流人還京師癸丑波斯王不賽因遣使朝賀廣西橫州徭寇永
純夏四月甲子如上都嶺北左丞潑皮爲左丞江南御史中丞朵
朵參知政事參知政事馬刺罷爲太史院使築渾河隄癸酉太子
詹事禿滿迭兒平章政事五月戊戌遷列聖神主於太廟新殿甲
辰赦上都囚笞罪以下者六月乙卯遣諸王闊闊出鎮畏吾兒庚
申魏王阿木哥薨諸王寬徹亦里吉赤來朝癸酉帝受佛戒於帝
師己卯怯別王遣使奉獻詔疏決繫囚存恤軍士免天下和買雜
役三年蠶戶差稅一年百官四品以下普覃散官一等三品遞進
一階遠隕瘴地不得歸葬妻子流落者有司資給還之仍著爲令
秋七月丙戌作楠木殿庚寅遣使代祀嶽瀆庚子諸王伯顏帖木
兒出鎮關連東部荅納失里出鎮沙州太師按攤出及知樞密院
事撒忒迷失帥衛士行邊戊申以籍入鐵木迭兒貲產還其家八

元書 卷十 三
月丁丑至上都九月乙酉封諸王也速不堅爲荆王乙巳昭獻
元聖皇后忌日飯僧萬萬人岑世興遣其弟興元朝貢冬十月壬
申安南世子陳日熿遣使朝貢丙子進雲南王王禪爲梁王仍以
其子帖木兒襲封雲南王封親王圖帖睦爾爲懷王十一月癸巳
封不賽因王府臣出班翌國公己亥朮溫台知樞密院事甲辰作
歇山盃頂樓於上都十二月岑世興黃勝許俱授懷遠大將軍安
撫使仍各賜幣帛二乙丑敕百官凡朝賀雨雪免朝服辛未鎖思
的王薨乙亥太白經天曲赦重囚三十八人是歲禿滿子太平襲
封陽翟王完者帖木兒子忽剌台襲封汝甯王囊家台子駙馬馬
札罕襲封趙王循州徭寇長樂有司捕治賓州反者雲南徭及大
理路蒙化州思州西陽州及容米九洞諸蠻爲寇陝西發兵以討
土蕃車里蠻慶遠徭八番生蠻韋光正及楊黃五種來附大都及

諸路水或旱蝗民飢黃河渾河滹沱渭水黑水江水清河洛水澧
洛皆溢龍慶雨雹如卵平地深三尺定州及成紀山崩同州地震
聲如雷袁州火

二年春正月以畿甸不登罷春畋參卜郎降辛丑出懷王圖帖睦
爾於建康甲辰諸王怯別遣使貢獻閏月壬子朔詔赦天下蠲除
差稅有差己巳修滹沱河堰癸酉作櫻毛殿戊寅忽塔梯迷失王
來朝土蕃爲寇鞏昌調兵禦之站八兒監藏叛於斡端二月丁亥
平伐苗酋降辛卯瓜哇遣使朝貢己酉封阿里迷失爲和國公平
章政事張珪爲蔡國公右丞善僧平章政事左丞潑皮爲右丞加
御史大夫禿忽魯太保庚子立行都水監於汴梁三月修濟陰河
隄乙丑如上都乙亥安南來貢夏四月丁亥作吾殿丙午焚夷及
蒐雁遮殺諭蠻使者詔追捕之丁未封皇后父火里兀察兒威靖

王戊申山東廉訪使許師敬爲左丞中政使馮亨參知政事五月
壬子車里陶刺孟及大阿哀蠻兵萬人乘象入寇木邦蠻率焚夷
萬人入寇飭邊將嚴備之癸丑龍牙門蠻入貢辛酉藩王璋薨於
京邸辛未遣平章政事察乃使於周王和世琜丙子置諫議書院
於昌平祀唐劉蕡廣西獠搖自春陷柳城攻城邑六月寇潯州達
魯花赤都堅都監姚泰亨死之雲南開南阿只弄哀培蠻兵爲寇
命發省兵捕之甲申徙嘉王晃火帖木兒爲并王革大臣兼領軍
務秋七月戊申大小車里蠻來獻馴象甲寅遣使奉詔諭猺蠻以
降播州蠻爲寇就命宣撫使楊燕里不花諭降之戊午遣使祀龍
虎武當癸亥修大乾元寺詔諸王斡兒朵罕監湖廣左丞乞住及
兵部尙書李大成中書舍人買閭將兵二萬討廣西猺江西發省
兵討海北猺思州洞蠻奉獻封駙馬孛羅帖木兒知樞密院事火

沙並爲郡王八月戊子修上都香殿辛丑遣使代祀嶽瀆名山大
川九月戊申分天下爲十八道詔宣撫使分行按問吏弊民隱審
理冤滯四品以上有罪申請五品以下便決其有政績尤異及晦
迹邱園才堪輔治者以名聞募富民入粟拜官不願仕者旌其門
諸王斡卽貢金浮圖癸丑至自上都壬戌諸王牙卽貢馬猺寇賓
州冬十月岑世興復反寇上林播州凱黎苗爲寇安南土官掠甯
遠癸未左丞相倒刺沙改御史大夫乙未皇后受佛戒於帝師十
一月周王和世琜遣使獻豹丙辰息州民郭菩薩妖言伏誅丁巳
幸大承華普慶寺岑世興結八番蠻入寇八番宣慰司官失備坐
罪廣西道獲猺酋潘寶下獄其弟潘見復寇柳州丙寅御史大夫
倒刺沙復爲左丞相加錄軍國重事右丞相旭邁傑薨十二月戊
寅知樞密院事薊國公塔失帖木兒爲右丞相加錄軍國重事波

斯王不賽因貢珠乙酉帝復受戒於帝師丁亥鎮南王脫不花薨
出平章政事乃馬歹攝鎮其地詔選宗室往鎮山東陝西湖廣申
禁圖讖私藏不獻者罪之立捕盜賞格斡耳朵罕王擊諸徭敗之
以故翰林學士不花中政使普顏篤指揮使卜顏忽里死鐵失之
難贈褒有差是歲大振諸路飢大都及諸路大水江河汾及潼川
水皆溢雹霜旱蝗成災伏羌山崩成紀山移蠲振有差

三年春正月丙午朔高麗國王燾遣使奉獻並賀正旦戊申甯王
辭徹禿并王晃火帖木兒來朝壬子封脫不花弟寬徹不花爲威
順王以鎮湖廣封買奴爲宣靖王以鎮益都波斯王不賽因遣使
獻馬己未以湘甯王八刺失里鎮斡羅思癸亥封朵列捏爲國公
知樞密院事撒的迷失出平章嶺北政事元江路總管普雙叛安
南阮叩寇思明緬國亂使人獻馴象以乞師二月壬午平章政事

乃馬歹改知樞密院事戊戌建殊祥寺於五臺山瓜哇入貢庚子
通政使察乃復平章政事甲辰如上都廣西全茗州土官許文傑
以諸徭寇茗盈州殺知州李德卿敕斡兒朵罕班師罷征徭三月
乙巳朔帝以不雨自責命審決重囚遣使祀嶽瀆名山大川及京
師寺觀丁巳遣諸王失刺鎮北邊夏四月修夏津武河隄五月甲
辰諸王怯別遣使獻豹八百媳婦蠻奉獻帝師兄僧峻南藏卜復
還俗乙卯命尙公主復封白蘭王岑世興及鎮安岑修文合蠻獠
六萬人爲寇八番巖霞洞蠻永明五洞徭及河西加木籠四部降
六月湘甯王八刺失里改鎮阿南荅的遼王脫脫來朝乙未梁王
王禪及武甯王徹徹禿鎮撫北軍己亥納皇姊壽甯公主女於中
宮奉元鞏昌中山大雨雹東平蝗大同水路五旱秋七月辛亥封
阿都赤爲綏甯王壬子皇后受牙蠻荅哥戒於水精殿甲寅幸大

乾元寺戊午波斯王不賽因獻駝馬己未玉龍帖木兒子月魯帖
木兒襲封齊王戊辰太白經天己巳大理土官奉獻大風雨雹龍
興辰州火汴梁水路三河溢三旱八蝗八月以災變罷獵罷行宣
政院及功德使司武備寺逋負兵器丁酉波斯王不賽因獻玉及
獨峯駝辛丑畋於旺兀察都西番土官來獻海寇來附大風海溢
大都大風多壞民居龍慶雨雹一只杭州火路五水九月庚申至
自上都雲南威楚諸路蠻降以爲二路一州五甸平遙汾溢懷慶
廬州蝗冬十月甲戌紐澤爲右御史大夫左丞許師敬爲右丞河
決汴梁樂樂隄十一月波斯王不賽因遣使獻虎及馬追復前
平章李孟官戊午脫不花弟帖木兒不花襲封鎮南王以鎮揚州
播州蠻宋王保降是月史惟良參知政事錦州水崇明海溢十二
月伯顏察兒平章政事欽察王月祖伯獻文豹扶靈洞蠻劉季來

降甯夏地連震者四聲如雷庚寅詔赦天下是歲駝馬瀋王世子
嵩仍襲瀋王以災及飢蠲振有差

四年春正月甲辰宣靖王買奴來朝壬子封諸王闊不花靖安王
鎮陝西庚申皇子允丹藏卜受佛戒於智泉寺浚會通河築灤州
護倉隄鹽官州海溢大甯水二月諸王也先帖木兒火沙河榮苔
里出鎮北邊壬午畋於灤州庚寅八百媳婦奉獻辛卯白虹貫日
三月辛丑皇子允丹藏卜出鎮北邊封那海赤惠國公癸卯和甯
地震聲如雷辛亥鎮西武靖王搠思班波斯王不賽因獻文豹西
馬佩刀珠寶辛酉太傅朵台爲太師太保秃忽魯爲太傅也可札
魯花赤伯苔沙爲太保壬戌上都親王八剌失思出鎮察罕腦
兒封寬撒爲國公阿散火者知樞密院事波斯王不賽因獻文豹
師子渾河決發軍民萬人塞之夏四月辛未盜竊武宗金主及太

廟祭器壬申作武宗主癸未鹽官海水溢甲午公哥列思巴沖納
思監藏班藏卜爲帝師乙未武備寺卿阿昔兒爲御史大夫四川
雲南湖廣蠻獠連年爲寇不止是月高州獠寇電白千戶張恆戰
死敕賜祠額曰旌義五月己未占城來貢丁卯罷諸王分地州縣
長官世襲德慶獠降睢州河溢衛輝大風九日禾盡偃大都及諸
路旱蝗路三雨雹六月罷兩都營繕慮囚紹慶四洞酋降中山雹
汴梁河決汝甯旱秋七月戊戌于闐王燕只吉台襲位遣使來朝
己亥八剌忽部晃忽奉獻占城貢馴象二建橫渠書院於鄆祠宋
儒張載乙丑周王和世琜及燕只吉王來貢藉田蝗衢州大雨水
遼河濟河黑河水溢延安旱八月癸巳上武宗皇后尊諡曰宣慈
惠聖皇后英宗皇后曰莊靜懿聖皇后升祔太廟修白浮瓊山河
隄滹沱溢浚治河河海俱溢通漕及天金山崩秦蜀楚同日地震

碣門地震聲如雷晝晦大都八路旱蝗路三水九月丙申朔日有
食之甯夏地震閏月己巳至上都太白經天王申詔大赦甲戌
命祀天地享太廟致祭嶽瀆名山大川八百媳婦蠻請官守置二
府冬十月脫別帖木兒王哈兒蠻王貢獻乙巳晝有流星己酉治
書侍御史王士熙參知政事丁巳御史中丞趙世延爲右丞安南
奉獻十一月雲南蒲蠻來附置府縣冀甯地震李羅王貢剛沙瓜
哇獻金文豹白猴白鸚鵡是歲蠲振有差封諸王察里台爲定王
致和元年春正月乙丑朔高麗遣使朝賀甲戌命繪蠶麥圖乙亥
詔百司凡不赴任及擅離職奪其官避差遣者笞之己卯占城來
貢禁僧道匿商稅戊子修京城二月庚申詔改元免河南自實田
糧一年被災州郡糧一年復業流民差稅三年疑獄繫三歲不決
者咸釋之壬戌太白晝見三月雲南安隆寨土官岑世忠及撒加

布來附置州一縣二甲戌雅濟奉獻己卯帝受無量壽佛戒於帝
師戊子如上都遷懷王圖帖睦爾於江陵夏四月己亥禁蒙古色
目人毋效漢法丁憂甲寅封蒙山神曰嘉惠昭應王洞庭神曰忠
惠順利靈濟昭佑王唐柳州刺史柳宗元曰文惠昭靈公五月廣
西普甯僧陳慶安作亂僭號改元己巳八百媳婦蠻獻馴象庚辰
有流星大如缶光燭地甲申安南及八洞蠻酋貢獻是夏路六大
雨雹四蝗二旱四水崇明大風海溢秋七月辛酉甯夏地震庚午
帝崩年三十有六葬起輦谷

論曰周太王以國傳王季設季而無後則泰伯之子孫遂不可以
復承周祀乎美哉晉王之讓而秦定之立亦不可不謂之正也上
都告變惜已無及然大節亦明矣故諸凶遷官非有他也倉卒之
閒形格勢禁度權力未足以制其命也榮寵以誘之俾喜而懈稍
緩須臾成備而出而疾雷不及掩耳矣嗚呼此帝之所以爲權然
豈不果哉至後紀綱弗振由不納張珪宋本之言而亂是用長也
累受佛戒亦梁武之儔乎

新甯劉能紀 刊

門人曾俞元襄校

門人曾士琮詳校

元書卷十

元書卷十一

天順帝本紀第十一

邵陽曾廉撰

天順皇帝名阿里吉八泰定皇帝長子也母曰宏吉刺皇后泰定元年立為皇太子致和元年七月庚午泰定皇帝崩其月己卯大甯地震乙酉皇后皇太子諭安百姓八月甲午僉書樞密院事燕鐵木兒以西安王阿忒荅納失里反執平章政事兀伯都刺伯顏察兒左丞朵朵參知政事王士熙參議省事脫脫吳秉道侍御史鐵木哥邱世傑治書侍御史脫歡太子詹事王桓等皆下獄遂據大都發兵守關要以拒皇太子於上都甲辰懷王圖帖睦爾反自江陵趨河南行省平章政事伯顏迎附之遂殺其省平章政事曲烈右丞別鐵木兒參知政事脫別台己酉上都諸王滿禿阿馬刺

元書 卷十一
台宗正札魯花赤闊闊出前河南平章政事買閭集賢學士兀魯
思不花太常禮儀院使哈海赤等十八人皆坐同燕鐵木兒謀逆
伏誅庚戌皇太子卽皇帝位於上都改元天順詔天下乙卯諸王
失刺平章政事乃馬歹詹事欽察帥師討反者燕鐵木兒使阿速
衛指揮使脫脫木兒拒戰於宜興乃馬歹欽察死之丁巳圖帖睦
爾入大都居於大內己未圖帖睦爾執隆鎮衛指揮使黑漢殺之
梁王王禪右丞相塔失帖木兒大尉不花平章政事買閭御史大
夫紐澤等出師南征次於榆林九月庚申及燕鐵木兒戰王師敗
績隆鎮衛指揮使幹都蠻襲執諸王明里帖木兒脫木赤於陀羅
臺以歸大都其日營王也先帖木兒遼東平章政事禿滿迭兒帥
師征圖帖睦爾克遷民鎮辛未圖帖睦爾殺兀伯都刺鐵木哥流
伯顏察兒朵朵王士熙脫歡等於遠州並籍其家壬申圖帖睦爾

自立爲皇帝癸酉遼東軍至薊州己亥梁王王禪克居庸關戊寅
爲燕鐵木兒之師敗於渝河辛巳又大戰於白浮王師敗績是時
陝西遼東四川雲南猶爲帝守前圖帖睦爾之發江陵也召及陝
西行臺侍御史馬札兒台行省平章政事鐵木哥不至圖帖睦爾
則遣前西臺御史刺馬黑巴往說之至陝西爲所殺至是荆王也
先不干靖安王闊不花發兵以勤王東擊潼關克之遂入陝州西
臺御史大夫也先帖木兒分兵北渡河中趨懷孟行省平章政事
鐵木哥南趨武關四川平章政事囊加台應之而燕鐵木兒拒王
師於石槽殺駙馬孛羅帖木兒平章政事蒙古塔失雅失帖木兒
將作院使撒爾封溫丁亥遼東軍克通州遂趨大都燕鐵木兒募
丁壯及百工乘城守禦戊子汝甯王忽刺台克紫荆關大都將士
皆潰冬十月己丑燕鐵木兒犯遼東軍於通州癸巳忽刺台之師

進逼大都南城是日陽翟王太平國王朵羅台及燕鐵木兒戰於檀子山陽翟王太平死之甲午忽刺台敗於蘆溝橋湘甯王八刺失里趙王馬札罕之師克冀甯丁酉圖帖睦爾命湖廣守歸峽八番以禦四川軍戊戌遼東軍克古北口敗於檀州南圖帖睦爾前頒卽位詔於甘肅至是頒陝西皆爲陝西臺省官焚毀收其使以告於朝然是時王師四出根本空虛辛丑圖帖睦爾兵遂陷上都帝不知所終遼王脫脫死之靖安王闊不花大敗河南兵克虎牢關進逼汴梁鐵木哥擊破武關兵進克鄧州及襄陽皆聞上都不守而還右丞相倒刺沙降於圖帖睦爾被殺而雲南左丞相也兒吉尼圖帖睦爾兩召之皆不至滇蜀遂圖分據數年乃定焉論曰曾子以託孤寄命臨大節而不可奪斯爲君子人也故山有猛虎樵采不入前史稱泰定帝能守祖宗之法故天下無事嗚呼

徒法不能以自行也嚮使漢武不委裘於霍光金日磾而倚上官桀桑宏羊則孝昭豈得晏然南面况又弗如孝昭者乎狃於近習而不知求天下之賢以佐佑之貴爲天子富有天下而不能庇其妻孥若敖之鬼餒焉咎安在哉君子是以不多子孟而樂道孝武之善付託也

新甯劉能紀 刊

門人曾傳澄襄校

門人曾士琮詳校

元書卷十一

元書卷十二

邵陽曾廉撰

文宗前紀第十二

文宗聖明元孝皇帝名圖帖睦爾武宗次子明宗之弟也母曰唐兀妃始號爲圖帖睦爾太子仁宗延祐三年明宗出居朔漠英宗立鐵木迭兒復爲右丞相構陷骨肉至治元年中政使唆住告脫歡察兒等交通親王於是出太子於瓊州三年六月英宗在上都謂丞相拜住曰朕兄弟實友愛曩以讒慝之言俾居遠方當亟召還明正小人離間之罪未及召而南坡難作泰定皇帝卽位改元遽召還旋命留於潭州居數月乃至京師其歲十月封爲懷王賜黃金印二年正月又命出居建康以殊祥院使也先捏掌其衛士致和元年春泰定皇帝出畋柳林以疾還宮於是泰定皇帝在位

五年矣皇太子方九歲無重厚不二心之臣子少國疑根本未固而僉書樞密院事燕鐵木兒總環衛已與諸王滿禿阿馬刺台太常禮儀院使哈海赤宗正札魯花赤闊闊出等相結爲秘計未幾泰定皇帝如上都也先捏復搆王於朝遷之江陵七月泰定皇帝崩梁王王禪遼王脫脫左丞相倒刺沙當國倒刺沙者回回人也專而寡謀驟握大權蒙古人尤深嫉之故眾惡皆歸焉時皇太子猶在上都八月甲午大都百官集興聖宮燕鐵木兒及西安王阿刺忒納失里陰結勇士以入兵皆露刃號於眾曰武宗皇帝有聖子二人孝友仁文天下正統當歸之今爾一二臣敢有紊邦紀不順者斬遂手縛平章政事兀伯都刺以下十一人下之獄語在天順帝紀燕鐵木兒既起事乃與西安王阿刺忒納失里共守內廷籍府庫錄符印閉百官於禁中乃遣前河南參知政事明里董阿

馳驛之江陵以迎王是日推前湖廣左丞相別不花爲左丞相太子詹事塔失海牙復平章政事前湖廣右丞速速爲左丞前陝西參知政事王不憐吉台爲樞密副使與右丞趙世延翰林學士承旨亦列赤通政使寒食分典機務乙未以西安王令給宿衛士鈔有差遂以兵守居庸關盧兒泰和諸嶺及白馬甸遷民鎮丁酉又遣撒里不花往迎王且陽爲使者自南來言王已次近郊以怵眾戊戌徵宣靖王買奴諸王牙不花於山東己酉明里董阿至汴梁則密告平章政事伯顏執諸行省官下之獄而盡收司府郡縣印辛丑以兵屯河中癸卯明里董阿至江陵甲辰王發江陵遣使召鎮南王帖木兒不花威順王寬徹不花湖廣平章政事高昌王帖木兒不花皆來會以湖廣左丞馬合某不附已執之丁未命將守古北口戊申河南兵守潼關庚戌天順皇帝卽位於上都其日王

元書 卷十一
二
至於汴梁伯顏以兵從辛亥王以燕鐵木兒知樞密院事乙卯阿速衛指揮使脫脫木兒敗上都兵於宜興丙辰燕鐵木兒備法駕以迎王丁巳王至大都戊午速速平章政事前御史中丞曹立爲右丞江浙參知政事張友諒參知政事河南左丞相伯顏爲御史大夫右丞趙世延爲御史中丞己未河南萬戶也速帶兒同知樞密院事是月天子命梁王王禪右丞相塔失帖木兒等帥師來伐九月庚申燕鐵木兒拒之於榆林敗之追至懷來而還壬戌高昌王帖木兒不花知樞密院事丁卯燕鐵木兒率諸王百官伏闕勸進王以兄周王在朔漠辭焉燕鐵木兒等復固請戊辰大司農明里董阿大都留守闊闊台並平章政事遣使分行河閒保定眞定及河南等路命襄鄧軍守武關己巳立行樞密院於汴梁壬申王卽皇帝位於大明殿大赦天下以致和元年爲天厯元年詔曰周

王遼隔朔漠宗戚將相百僚耆老以爲神器不可以久虛朕姑從其請謹俟大兄之至以遂朕固讓之心癸酉封燕鐵木兒太平王右丞曹立出平章江浙政事福建廉訪使易釋董阿爲右丞甲戌燕鐵木兒爲右丞相加錄軍國重事仍知樞密院事丙子梁王王禪游兵至大口帝至齊化門視師將親督戰燕鐵木兒請任之帝還宮燕鐵木兒連戰破梁王王禪走之戊寅加漢前將軍關羽封號辛巳左丞相別不花兼知樞密院事癸未同知樞密院事禿兒哈帖木兒知樞密院事乙酉嶺北左丞燕不隣知樞密院事天子遣兵入古北口燕鐵木兒敗之於石槽同知樞密院事脫脫木兒敗遼東軍於薊州南增兵募丁以守大都及直沽山東海港丁亥調丁以守冀甯晉甯關隘以原籍尙書左丞相三寶奴家貲制命還其家是月邛州地震鹽井水溢陝西軍入陝州及晉甯遼東軍

抵大都冬十月己丑遼東軍敗走河南兵守虎牢關癸巳汝甯王
忽刺台將兵自紫荆關入逼南城燕鐵木兒敗陽翟王太平兵於
檀子山乙未又敗忽刺台兵於蘆溝橋是日湘甯王八刺失里兵
入冀甯齊王月魯帖木兒東路蒙古元帥不花帖木兒聞帝卽位
卽趣上都圍之辛丑兵破上都左丞相倒刺沙奉皇帝寶以降齊
王月魯帖木兒遂殺遼王脫脫盡收諸王符印是日同知樞密院
事脫脫木兒通政使也不倫並知樞密院事御史中丞亦列赤爲
御史大夫還給伯顏察兒朵朵家貲甲辰革晉遼二王所轄路府
州縣達魯花赤選流官代之丙午詔從省臣言凡有罪者後勿沒
妻子丁未平章政事塔失海牙罷爲大司農欽察台復平章政事
侍御史月魯不花爲御史中丞陝西軍入虎牢己酉知樞密院事
別不花罷以爲太保陝西軍入武關庚寅帝御興聖殿受皇帝寶

癸丑燕鐵木兒辭院職以其叔父蒙古元帥不花帖木兒代知樞
密院甲寅元帥也速帶兒執湘甯王八刺失里汝甯王忽刺台趙
王馬札罕以歸皆殺之丙辰從燕鐵木兒言以前沒逆臣赤因帖
木兒家貲還其妻陝西軍入鄧州丁未毀顯宗廟室戊午詔上都
官吏自八月二十一日以後擢用者並追毀其制敕天下僧道有
妻者皆合爲民十一月己未太保伯蒼沙爲太傅總兵北邊辛酉
陝西御史大夫也先帖木兒降甲子帝親享太廟陝西軍進逼汴
梁庚午收上都新印鈔辛未陝西軍入襄陽荆王也速也不干傳
檄罷兵乃與攻汴梁之師皆引還壬午杖流諸王失刺及同知樞
密院事阿乞刺十人於遠方籍其家甲戌安置泰定皇后於東安
州杭州火乙亥賜西安王阿刺忒納失里齊王月魯帖木兒知樞
密院事不花帖木兒以下從者及軍士金銀鈔各有差丙子平章

政事速速坐贓流徙以母老詔留京師己卯諸衛漢軍及州縣丁壯所結甲冑兵仗皆令還官帝以天下既定庚辰乃遣合散奉迎皇兄周王於朔漠是日中政院使敬儼平章政事同知樞密院事徹里帖木兒爲左丞壬午命以第三皇子太平訥養於大司農買住保家詔行樞密院罷兵還御史中丞月魯不花爲右丞癸未殺梁王王禪國王朵羅台礫右丞相倒刺沙尸右御史大夫紐澤知樞密院事撒的迷失西臺大夫也先帖木兒皆論死甲申威順王寬徹不花還鎮湖廣丙戌左丞相兼知樞密院事別不花罷四川平章政事囊加台稱鎮西王以其省左丞脫脫平章政事前雲南廉訪使楊靜爲左丞殺其省平章政事寬徹燒絕棧道十二月己丑命賜民鈔以償前毀其屋塞關隘者丙申幸大崇恩福元寺知行樞密院事也先捏有罪杖流南甯庚子赦天下賜諸王滿禿爲

果王阿馬刺台爲毅王宗正札魯花赤闊闊出等十六人贈卹有差戊申御史大夫伯顏爲太保甲寅復遣治書侍御史撒梯詣朔漠以迎皇兄周王丁巳進西安王阿刺忒納失里爲豫王左丞徹里帖木兒爲右丞參知政事躍里帖木兒爲左丞參議省事趙世安參知政事帝前遣使召雲南左丞相也兒吉尼不至是月復召之又不至加諡唐司徒顏真卿正烈文忠公陝西自泰定二年至是歲不雨大飢民相食杭州等路水沒民田萬四千頃河北山東有年

天祿二年春正月己未朔立都督府庚申高麗遣使朝賀平章政事敬儼以傷足告歸封知樞密院事火沙爲昭武王牀兀兒子荅里襲封句容郡王辛酉知樞密院事高昌王帖木兒不花爲左丞相大司農王毅復平章政事平章政事欽察台改知樞密院事復

封朶列帖木兒爲楚王忽都帖木兒王薨癸亥右丞相燕鐵木兒改御史大夫甲子齊王月魯帖木兒薨丙寅幸大崇恩福元寺壬申以遼陽三萬戶助上都舉兵收其印符制敕丁丑囊加台攻播州宣慰使楊燕里不花開關納之囊加台弟陝西蒙古軍都元帥不花台斬其使辛巳起復左丞史惟良以爲御史中丞壬午陝西御史大夫阿禮海牙平章政事四川軍臨烏江諸王月魯帖木兒帥師扼之是月同知儲慶司事王結參知政事二月庚寅御史大夫燕鐵木兒復爲右丞相辛卯立宏吉刺氏爲皇后癸巳遣翰林侍講學士曹元用祀孔子於闕里丁酉囊加台至金州據白土關詔鎮西武靖王搠思班調軍及湖廣行省兵討之戊戌命察罕腦兒宣慰使撒的迷失合軍進討禁傭雇者告訐主家著爲令辛丑追尊母唐兀妃曰文獻昭聖皇后建遊皇城佛事雲南土官咸貢方物丙午囊加台兵逼襄陽治書侍御史撒梯還自朔漠言皇兄周王已於正月丙戌卽皇帝位於和甯之北辛亥謂羣臣曰今自二月二十一以前除官者速與制敕後凡銓選其詣行在以聞夏四月癸卯皇帝命立爲皇太子

新甯劉能紀 刊

門人曾廣冀襄校

門人曾士琮詳校

元書卷十一

元書卷十三

邵陽曾廉撰

明宗本紀第十三

明宗翼獻景孝皇帝名和世疎亦曰忽失刺曰火失刺武宗長子也母曰亦乞烈妃初武宗立仁宗為皇太子命以次傳和世疎既而仁宗立延祐二年議立儲事右丞相鐵木迭兒以皇太后意屬英宗由是讒之遂封和世疎為周王遣鎮雲南三年為置常侍府官屬及中尉諮議記室示優異之王既出就鎮十一月次於延安常侍禿魯忽孛羅尙家奴及武宗舊臣釐日沙不丁哈八兒禿皆來會常侍教化謀曰天下者我武皇之天下也上意非欲王出鎮實由左右讒搆而然請以其故白之行省俾聞於朝廷庶可杜塞離間不然事變叵測也初阿撒罕為太師鐵木迭兒奪其位以為

陝西丞相及聞教化言遂與平章政事塔察兒行臺御史大夫脫里伯中丞脫歡悉發關中兵分道自潼關河中入已而塔察兒脫歡襲殺阿撒罕教化於河中王遂西行至金山西北諸王察阿台部居焉王與定約歲冬居札顏夏居幹羅幹察山春則命從者耕於野泥凡十餘年邊境甯謐英宗既嗣有天下至治三年被弑而泰定皇帝立傳至其子天順皇帝而僉書樞密院事燕鐵木兒實爲異圖乃據大都而立王弟懷王圖帖睦爾爲皇帝改元天祿燕鐵木兒爲右丞相錄軍國重事太平王語已具文宗前紀先是燕鐵木兒之構變也懼弗勝乃令人矯爲使者北來言周王整兵南行卽至矣聞者皆悅於是圖帖睦爾及燕鐵木兒知人心之繫於王也至是乃遣治書侍御史撒梯等迎王南還且勸進是時朔漠諸王亦皆謂王宜有天下各以其兵扈從其歲王踰金山遣常侍

孛羅如京師兩京之民皆驩呼鼓舞曰吾天子實自北來矣諸王舊臣爭先迎謁所至成聚明年正月丙戌卽皇帝位於和甯之北二月壬辰宣靖王買奴朝於行在辛丑追尊母亦乞烈妃曰仁獻章聖皇后是月癸丑諸王月魯帖木兒招播州宣慰楊燕里不花以降甲寅圖帖睦爾立奎章閣學士院三月戊午朔次迦堅茶寒辛酉圖帖睦爾遣燕鐵木兒奉皇帝寶來上臺院官從復命有司奉金銀幣帛及金帶備賜與焉癸亥圖帖睦爾改其所經諸路建康曰集慶江陵曰中興瓊州曰乾甯潭州曰天臨戊戌雲南諸王塔失不花秃堅不花平章政事馬思忽集眾五萬逐其省右丞相也兒吉尼而自置參知政事己巳圖帖睦爾以其集慶居邸建大龍翔集慶寺辛未圖帖睦爾令監察御史及札魯花赤錄囚壬申又以冬春無雪雨令中書及有司分禱山川羣祀乙卯圖帖睦爾

置行樞密院於湖廣河南以擊四川丁丑圖帖睦爾特令文獻昭
聖皇后神御殿俱如列聖故事丁亥雨土霾夏四月壬辰浚鄴州
漕運河癸巳燕鐵木兒入覲於行在命以爲太師仍右丞相錄軍
國重事太平王命百官皆仍舊而以武宗舊人哈八兒禿平章政
事前平章政事伯顏帖木兒知樞密院事甲午立行樞密院命知
樞密事昭武王火沙領行樞密院事賽帖木兒買奴並同知行樞
密院事乙未宣諭省院臺官恪遵成憲百司誓御毋得越請貽罰
己亥圖帖睦爾遣使曲赦囊家台辛丑圖帖睦爾以立都督府及
臺憲官除日並奏皆從之癸卯遣武甯王徹徹禿平章政事哈八
兒禿立圖帖睦爾爲皇太子其日命左丞相帖木兒不花攝告卽
位於郊廟社稷以徹里帖木兒平章政事闊里吉思爲右丞乙巳
從臺臣言以領北廣輪萬里太祖肇基黜其省臣不任職者鎮南

王帖木兒請以爵還其兄子孛羅不花丙午皇太子以孛羅不花
襲鎮南王占臘來貢羅香木及象豹白猿五月丁巳行次朵兒伯
真戊午封鐵木兒保德郡王賜扈從衛士幣帛有差己未皇太子
遣翰林學士承旨阿憐帖木兒來覲庚申行次斡耳罕木東癸亥
行次必忒怯禿命有司新武宗帳殿車輿乙丑皇太子建大承天
護聖寺庚午命燕鐵木兒升用嶺北官吏餘官賜散官一級潛邸
舊臣及扈從選用有差壬申行次探禿兒海封亦憐真八柳城郡
王甲戌皇太子令省臣擬注中書六部官奏於行在所乙亥行次
土兀刺敕大都省臣鑄皇太子寶是日皇太子如大聖壽萬安寺
丁丑皇太子發京師以迎車駕諸王駙馬及扈衛百官從己卯行
次土兀刺河東庚辰皇太子合置江淮財賦總管府辛巳行次斡
羅斡禿壬午行次不魯通甲申行次忽刺火失溫六月丁亥朔行

次坤都野不刺丁酉行次兀納八己亥行次闊朵辛巳行次撒里
怯兒壬寅戒近侍毋得輒有奏請丙午永平大風驟雨平地出水
丁未行次哈里溫太白晝見戊申行次闊朵傑阿刺倫辛亥行次
哈兒哈納禿詔省臣凡國家錢穀銓選諸大政先啟皇太子然後
以聞癸丑行次忽禿是月陝西兩皇太子賜鳳翔府岐陽書院額
以書院祀周文憲王設學官春秋釋奠如孔子焉是夏大賑諸路
飢秋七月丙辰朔日有食之己未皇太子令更定遷徙法癸亥太
白經天甲子行次字羅火你乙亥行次字羅茶寒丙子皇太子受
寶戊寅行次小只辛巳發諸路衛軍完京城陽曲雨雹如卵八月
乙酉朔行次旺忽察都丙戌皇太子入見是日宴皇太子及諸王
大臣於行殿庚寅帝暴崩年三十葬起輦谷帝少有英氣故爲皇
太后所忌長好學術習故事方卽位遣撒梯還京師諭之曰汝其

語朕弟聽政之暇宜親賢士大夫講論史籍以知古今治亂得失
也旣受皇帝寶其日宴諸王大臣於行殿諭臺臣曰太祖有言美
色名馬人皆悅之然敗名喪德鮮不由此心繫之故也卿等亦念
之乎世祖立御史臺首以命塔察兒奔帖傑兒天下國家譬如人
之一身中書右手也樞密則左手也左右手有病則治之以良醫
則御史臺是也故風紀重則貪墨懼猶斧斤重則入木深其勢然
也且朕有闕失卿等亦當以聞不爾責也使久於在位亦誼主矣
論曰昔曹子臧吳季札賢者也其君國子民也宜哉然而義不受
者非獨遠情亦知負芻及光之不厭其欲將無以善其後也閻哉
明宗焉有人披袞執玉穆穆然位乎天位而肯北面俯首爲人臣
者乎嗚呼此唐明皇不敢以望肅宗父子且然况兄弟哉文宗蓋
懼北陲復有海都篤哇之流託名擁戴其言也順而爲患也深抑

亦私心竊望周王之效法晉邸也已則非夷而以齊期人不亦難乎悠悠南行甘咽其餌悲夫

新甯劉能紀 刊

門人曾紀培襄校

門人曾士琮詳校

元書卷十三

元書卷十四

邵陽曾廉撰

文宗甯宗本紀第十四

明宗之暴崩於旺忽察都也燕鐵木兒入御帳取皇帝寶授皇太子遂疾驅而還壬辰左丞相帖木兒不花以下諸宰執皆罷御史大夫伯顏為左丞相仍太保知樞密院事欽察台復平章政事太子詹事阿兒思蘭海牙集賢大學士趙世延並平章政事甘肅平章政事朵兒只為右丞參議省事阿榮太子詹事丞趙世安並參知政事前右丞相荅失帖木兒知樞密院事左丞相高昌王帖木兒不花上都留守鐵木兒脫並為御史大夫平章政事哈八兒禿出平章嶺北政事徹里帖木兒出平章河南政事癸巳至於上都乙未賜護守大行皇帝山陵官御史大夫孛羅等鈔有差流諸王

忽刺出於海南戊戌囊加台坐指斥乘輿大不道殺之己亥皇太子復即皇帝位於大安閣大赦天下辛丑立甯徽寺癸卯詣世祖所御幄殿被祭詔凡送諸王駙馬聽受贈衣馬毋受金幣犯者論賊乙巳發卒浚通惠河丙午封牙納失里爲遼王戊申進甯肅王寬徹爲肅王己酉車駕發上都大行皇帝北來衛士及辭怯官賜鈔有差禁行省諸官託朝賀斂鈔前左丞相別不花有罪並其妻子安置集慶加大都城隍及其夫人封號大名諸路旱蝗振糶京師貧民九月加封故開府儀同三司大真人上卿元教大宗師張留孫爲道祖神應真君丁卯車駕至大都戊辰敕凡頒赦詔使者稍失期嚴其罰辛未知樞密院事答失帖木兒罷丙子御史大夫帖木兒不花加錄軍國重事論也先捏以不忠不敬罪誅之諸王八刺馬忽都火者部曲乘亂爲寇詔捕治之壬午封知樞密院事燕

不憐興國公癸未建顏子廟於曲阜故陋巷冬十月丙戌遣鎮南王孛羅不花還鎮揚州辛卯燕鐵木兒率百官請上尊號不許申飭海道轉漕之禁杖流囊加台黨楊靜等於遼東封太禧宗禋院使禿堅帖木兒梁國公丙申上大行皇帝尊諡曰翼獻景孝皇帝廟號明宗國語曰護都篤皇帝壬寅大甯地震癸卯敕刑部察民之無賴者懲治之戊申徵朵朵王士熙等十二人於貶所放還鄉里庚戌詔罷大承天護聖寺工役釋疑獄已絕債命通政院補逃亡驛戶自大都至上都官爲應付驛費一年免徵奉元路商稅一年免竈戶雜泛夫役二年命免永平屯田租命所在官司設常平倉命赦雲南八番爲囊加台所誑誤者是月參知政事趙世安爲左丞十一月乙卯受佛戒於帝師癸亥翰林學士承旨闊徹伯知樞密院事丙寅罷功德司歸宣政院己巳治書侍御史撒梯爲右

丞庚午收闕不花靖安王印仍鎮陝西丁丑高麗國王燾以疾辭位命其子楨襲高麗國王壬午以豫王阿剌忒納失里鎮雲南十月甲申輦真乞刺思爲帝師丙戌詔百官陳言庚寅祓祭於太祖幄殿詔省臣凡有奏陳必議定其署乃入奏命臺臣凡風憲官赴任均給驛乙未封前鎮南王帖木兒不花宣讓王鎮廬州己亥加諡漢長沙王吳芮爲長沙文惠王甲辰以明年正月武宗忌辰命僧預誦佛經二藏於大崇福元寺戊申御史中丞太禧使月魯不花爲御史大夫辛亥改上都饅頭山曰天秣山是歲集賢學士朵兒只襲國王安南國王陳益稷卒於漢陽大振諸路飢至順元年春正月丙辰知樞密院事別帖木兒出爲遼陽左丞相丁丑追封三寶奴郢城王加封秦蜀郡太守李冰聖德廣裕英惠王其子二郎爲英烈昭惠靈顯仁祐王雲南諸王禿堅萬戶伯忽

阿禾等據中慶殺廉訪司官執其省左丞忻都是月和尚蔡文淵並參知政事二月壬午朔左丞趙世安改御史中丞以御史中丞史惟良爲左丞丁亥以大飢詔入粟補官僧道人己粟者加師號丙申雲南蒲蠻來朝丁酉帝及皇后皇子並受佛戒乙巳封明宗子懿璘質班爲郕王丙午平章政事阿兒思蘭海牙罷爲南臺御史大夫丁未詔罷置左丞相以伯顏復知樞密院事仍太保錄軍國重事以右丞相燕鐵木兒總領中書事戊申太禧宗禋使阿禮海牙復平章政事禿堅兵破仁德人馬龍遂稱雲南王伯忽阿禾自置丞相平章政事三月丁巳徙濟陽王朵納列爲吳王改封吳王潑皮爲濟陽王戊午封皇子阿剌忒荅刺爲燕王命彰德路歲祭羨里周文王祠辛未封知樞密院事不花帖木兒武平郡王壬申祔明宗於太廟序英宗上甲戌封諸王搠魯蠻西甯王詔豫王

元書 卷十四 三
阿剌忒納失里帥師出八番以擊雲南以河南平章政事乞住爲雲南平章政事八番順元宣慰使帖木兒不花爲雲南左丞從王西征丁丑賜燕鐵木兒功勳碑夏四月丙戌封也真也不干桓國公辛丑明宗皇后崩五月戊午燕鐵木兒率百官上尊號曰欽天統聖至德誠功大文孝皇帝詔改元丁卯詔豫王阿忒思納失里鎮西番戊辰如上都以妥懽貼睦爾非明宗子詔天下封平章政事趙世延魯國公辛未以太禧宗禋使亦列赤平章政事參知政事蔡文淵罷張友諒復參知政事六月丙辰河溢大名庚子燕鐵木兒殺知樞密院事闊徹伯脫脫木兒通政使只兒合郎等十二人並籍其家是夏烏撒士官祿余叛附於禿堅殺宣慰司官吏羅羅蠻舉兵應之詔豫王阿剌忒納失里及鎮西武靖王搠思班諸王禿剌分道進兵復立行樞密院調江淞江西湖廣兵及河南之

師會討雲南雲南右丞躍里帖木兒及四川軍擊烏撒及羅羅蠻敗之秋七月辛亥徹里帖木兒子運按察襲封廣甯王丁巳波斯王不賽因遣使來朝己未通渭山崩乙丑翰林學士承旨也兒吉尼知樞密院事築瀾州柳林海子隄堰丙寅大風雨雹丁丑鐵木迭兒子將作使鎖住及弟觀音奴姊夫太醫院使秦國公也里牙坐怨望厭禳呪詛並前刑部尙書烏馬兒前御史大夫孛羅上都留守馬兒皆誅之開元諸路自夏不雨至於是月奉元諸路蝗祿余及烏蒙東川茫部連兵以向順元閏月庚辰封駙馬卯澤永甯王參知政事和尚改御史中丞辛卯西臺中丞脫亦納參知政事平章政事趙世延罷仍爲翰林學士承旨奎章閣大學士戊戌封知嶺北行樞密院事乃蠻合宣甯郡王駙馬謹只兒鄆國公戊申加封孔子父啟聖王母爲啟聖王夫人顏子充國復聖公曾子郈

國宗聖公子思沂國述聖公孟子鄒國亞聖公程顥豫國公程頤
洛國公杭州諸路水八月丁巳欽察王祖伯遣使來京師己未至
自上都壬申詔興舉蒙古字學嚴宿衛容匿漢南高麗人及奴隸
濫充之禁九月庚辰大甯地震甲申敕樞密院宗正府及遼陽行
省歲遣官巡問東方諸王部訟獄癸巳白虹貫日甲午封魏王阿
木哥子阿魯西靖王乙未前平章政事徙湖廣速復以罪竄雷
州己亥敕諸人非其本俗敢有弟收嫂子收庶母者罪之壬寅左
丞史惟良以養告歸仍賜鈔二百錠丁未參知政事張友諒爲左
丞知樞密院事脫別台出爲陝西御史大夫冬十月戊申朔降璽
書申飭衍聖公崇奉孔子廟祀戊午致齋大明殿辛酉始服大裘
袞冕祀昊天上帝於南郊以太祖皇帝配十一月四川平章政事
塔出出永甯左丞孛羅出青山茫部陳兵周泥驛擊祿余敗之又

敗之於七星關羅羅蠻改建昌躍里帖木兒追敗之於木托山下
仁懷府權達魯花赤曲朮及伯忽戰於馬金山獲伯忽及其弟伯
顏察兒辛卯前平章政事闊闊台知樞密院事十二月己酉以漢
董仲舒從祀孔廟辛亥立燕王阿剌忒荅刺爲皇太子戊午大赦
天下甲戌御史中丞和尚坐受婦人爲賂赦免仍禁錮之是月鎮
西武靖王搠思班及躍里帖木兒斬阿禾復中慶是歲振糶京師
飢民自諸路及蒙古水達達諸驛皆振貸之

二年春正月丁亥詔復建壽安山大昭孝寺辛卯皇太子薨甲辰
敕每歲四祭五福太一星知行樞密院徹里帖木兒四川左丞孛
羅及烏撒兵戰射祿余中之烏蒙東川諸蠻降二月四川懷德諸
洞蠻內附湖廣參知政事徹里帖木兒等坐怨言流之並籍其家
己酉白虹貫日壬子太白晝見平章政事亦列赤兼瀋陽安撫使

燕王宮相伯撒里平章政事陝西御史中丞朵兒直班參知政事
丁巳武甯王徹徹禿以駙馬卜顏帖木兒來朝壬戌進徹徹禿爲
鄴王庚午占城遣使入朝修上都洪禧崇壽殿諸王辭徹禿沙哥
坐妄言不道安置廣州及雷州甲戌雲南景東甸蠻官獻馴象三
月丙戌雨土霾庚寅命威順王寬徹不花還鎮湖廣豫王阿剌忒
納失里鎮西武靖王搠思班禽雲南亂黨磔以徇夏四月丙午論
天祿兵興諸領軍功頒賞有差庚戌詔建燕鐵木兒生祠於紅橋
南樹碑紀勛焉戊午以集慶元妙觀爲大元興崇壽宮辛酉儲政
院使哈撒兒不花度支卿納哈出有罪除名甲子詔以原籍故尙
書右丞相脫虎脫貲產還其家雲南平詔留荆王也速也不干諸
王鎖南駐軍暫鎮之召諸統兵官赴關潞城大水河中蝗路四旱
種未下衡州比歲旱蝗疾疫武陟地震逾月不止五月雲南威楚

蒲蠻來貢詔置散府一土官三十三甲午封宣政使脫因薊國公
乙未西臺大夫脫別台復知樞密院事御史大夫月魯不花辭免
丙申如上都戊戌幸燕鐵木兒生祠辛丑太白經天路五水六月
乙未太白晝見京師及五路水漳水決臨漳雲南兵罷還烏撒羅
羅蠻復殺戍軍行樞密院兵連戰破之秋七月壬午詔黜四川平
章政事欽察台並其妻孥禁錮廣東丁未諸王搠思吉亦兒甘卜
哈兒蠻駙馬完者帖木兒遣使貢獻知樞密院事脫別台復爲御
史大夫乙未立閔子書院於濟南戊戌封太保知樞密院事伯顏
浚甯王湖廣廣西徭累歲多出爲寇諸王云都思帖木兒平之庚
子詔召王還海南黎蠻爲寇詔調兵討之杭州火安吉大水冀甯
雨雹八月甲辰朔日有食之封脫憐忽禿魯靖恭王沙藍朵兒只
懿德王波斯王不賽因遣使來朝辛亥至上都丙辰封內史怯

列該豐國公景州自六月至是月不雨江浙諸路水九月癸酉詔
 市宅命燕鐵木兒奉皇太子古納荅刺居之祿余寇順元雲南行
 省遣都事阿海以參政制命往招之祿余拒不受而殺阿海雲南
 左丞帖木兒不花與戰不克引還冬十月甲辰遣祕書太監王珪
 等代祀嶽鎮海瀆后土癸丑幸大承天護聖寺蒙古都元帥怯烈
 潛師入澂江路海中山禿堅弟必刺都古彖失舉家赴海死吳江
 太湖溢十一月壬申朔日有食之乙亥李彥通蕭布蘭奚謀反伏
 誅丙子封諸王幹卽保甯王己卯封薩班幽國公辛巳戶部尙書
 耿煥參知政事癸卯詔養燕鐵木兒子塔刺海爲子賜居第荆王
 也速也不干獻犛牛十二月壬子復命諸王忽刺出還鎮雲南丁
 巳雨木冰戊午朵列帖木兒獻西馬蒲萄酒庚申遣官錄囚癸亥
 雨木冰是歲蠲振有差

三年春正月辛未朔高麗遣使朝賀癸酉命高麗國王燾復位丁
 丑禁冒哀求敘復者己卯詔罷工役惟城郭橋道倉庫勿禁壬午
 詔封孔子妻卍官氏大成至聖文宣王夫人丁亥幸大承天護聖
 寺黎蠻寇陵水忠信寨洞蠻寇施州二月癸卯也先帖木兒王薨
 甲辰荅兒麻失里王哈兒蠻王貢蒲萄酒西馬金鴉鶻己巳詔修
 曲阜孔子廟復詔赦祿余祿余降三月洛水溢丁亥伯岳兀王完
 者帖木兒王來朝己丑復立功德使司癸丑更皇太子古納荅刺名
 燕帖古思乙未調衛士三百人爲帝師挽舟高梁河丁酉緬國來
 貢是春瓜哇占城皆各遣使以金書表入貢夏四月戊申大甯地
 震丙辰不別居法郎王及波斯王不賽因各貢方物乙丑安南來
 貢安西王阿難荅子月魯帖木兒坐與國師沙津愛護持必刺忒
 納失里共謀不軌皆伏誅並籍其家命有司爲伯顏建生祠樹碑

元書 卷十四
於涿州及汴梁戊辰詔免雲南田租三年是月四川師壁大盤諸洞蠻來貢五月己巳高昌王饒吉薨以其弟太平奴襲高昌王戊寅幸大承天護聖寺京師地震有聲己卯命諸王也失班還鎮浙西庚寅如上都置山東金銀銅鐵提舉司壬辰禁加封淫祠丁酉白虹並日出長竟天追封顏子父無繇杞國公母姜氏杞國夫人妻戴氏兗國夫人甘州大雨雹黃河及滹沱決杭州池州火六月己亥朔詔赦天下復四川一年免陝西今年商稅錄用宋宋王士熙脫歡等己酉御史中丞趙世安爲左丞癸丑遣使祀嶽鎮海濱乙丑嚴起復之禁秋七月戊辰荅兒麻失里王遣貢虎豹辛未賜從征雲南將校有差壬辰波斯王不賽因來貢珍寶甲午欽察王月祖伯遣使朝貢詔諸王徹徹禿沙哥皆還本部癸卯吳王木喃子及荅都河海王鎖南管卜王帖木兒赤王帖木迭兒王來朝乙

巳天鼓鳴於西北己酉隴西地震其日帝崩年二十九葬起輦谷論曰元自文宗始親郊祀禮彬彬焉尊崇聖賢之典至是益隆而開奎章閣以致儒臣考文章論治道勤於延訪可以爲文矣然幾沈而氣銳抑亦吳闔廬之流也其言泰定帝通賊臣陰謀冒干寶位嗚呼文宗將毋其自道之也歟且晉郈曰有盟書周王可必其終爲泰伯乎文宗之深心乃以讓濟其忍然後足固其威福也豈不險哉生則欺人死而猶飾故地碎其主春秋震夷伯之廟所謂有隱慝者乎

甯宗冲聖嗣孝皇帝名懿璘質班明宗次子也母曰乃馬真皇后明宗崩文宗再卽阼至順元年封鄜王三年八月文宗崩於上都遺詔曰立明宗之子是時明宗子惟王留京師太師右丞相太平王燕鐵木兒欲立之而疑思秘詔不發而遣使徵諸王會京師因

以中宮旨賜諸王駙馬大臣金銀幣帛有差九月辛巳夕地震有聲來自北時燕鐵木兒禮絕百僚威燄熏灼宗戚諸王皆無敢言又久之猶不立君中外洶洶燕鐵木兒乃請立皇子燕帖古思皇后不從命立王十月庚子卽皇帝位於大明殿大赦天下詔蠲減諸路差稅緩工役已逋欠內外官舉守令讞疑獄廣海雲南梗化之民詔書到後六十日內出官與免本罪辛丑右丞撒迪平章政事宣政使闊里吉思爲左丞平章政事秃兒哈帖木兒改知樞密院事知樞密院事撒敦改御史大夫丁未敕諸王駙馬勳舊大臣及省院臺秩正二品百司庶府秩至一品者闕門內得施繩牀以坐餘皆禁之乙卯以卽位告祭南郊己未告祭太廟庚申告祭社稷丙寅楚邱河隄壞發民丁修之是月立皇后宏吉刺氏十一月壬申命鄴王徹徹秃鎮遼陽戊寅尊皇后曰皇太后壬辰帝崩年

七歲葬起輦谷

論曰文宗殺明宗皇后播告天下言妥懽貼睦爾非明宗子旣出之於靜江乃立皇子燕王阿剌忒荅刺爲皇太子公私之情見矣皇天弗佑元良天喪及大漸而憂其少子之弱非妥懽貼睦爾不能延其祚而不可爲之辭矣則亦曰立明宗子一似以明其固讓之初志也者任後人之擁戴猶武宗之孫也惟甯宗亦弗永年而大位卒歸於向所猜忌之兄子天也人豈有爲哉

元書卷十四

新甯劉能紀 刊

門人曾淑身襄校

門人曾士琮詳校

48-11446

